

**Spicilegium observationum de Indorum morbis et medicina ... / [Johann Philipp Paxmann].**

**Contributors**

Paxmann, Johann Philipp.  
Fürstenau, Johann Hermann, 1688-1756.  
Universität Rinteln.

**Publication/Creation**

Rintelii : Joh. Godofr. Enax, [1735]

**Persistent URL**

<https://wellcomecollection.org/works/d3fcbnxb>

**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

20  

---

Q. B. V.

---

**SPICILEGIUM  
OBSERVATIONVM  
DE INDORVM MORBIS  
ET MEDICINA.**

---

INDVLGENTE MEDICORVM ORDINE  
IN ALMA ERNESTINA

*PRAESIDE*

**D. IO. HERMANNO FÜRSTENAU**

PRIMARIO MEDICINAE, OECONOMIAE

ORDINARIO PROFESSORE,

ORDINIS MEDICI H. T. DECANO,

*PRO LICENTIA*

IMPETRANDI SVMMOS IN ARTE SALVTARI HONORES

PVBlico SENATVS ACADEMICI EXAMINI

EXPOSITVM

*A*

**IOHANNE PHILIPPO PAXMANNO**

HAMELIENSI.

---

D. XXXI. MART. CIOIOCCXXXV.

H. L. Q. S.

---

RINTELII TYPIS IOH. GODOFR. ENAX  
ACAD. TYPOGR.



PICTURE  
PRESERVATION  
DE INDOAN MORIS  
ET MEDICINA

INDOAN MORIS  
IN ALLE KUNSTEN  
ET  
JOHANNES FORSTENAU


INDOAN MORIS  
OCCIDENTALIS  
OCCIDENTALIS  
PROFESSOR  
ET  
HONORABILIS  
ET  
HONORABILIS

JOHANNES FORSTENAU

JOHANNES FORSTENAU

JOHANNES FORSTENAU






## OBSERVATIO I.

**S**picilegium post messem instituere, uti in  
Somni disciplinarum genere, ita in arte  
cum primis salutari juvat.

### SCHOLION.


**A**mplam post messem rerum in omni do-  
ctrina pulcherrimarum, obviarum,  
reconditarum, utilium, necessariarum,  
jucundarum, æquo & industrio rerum  
scrutatori spicilegium usque relictum esse, intelli-  
gentibus constat. Neque vero, id ut planum singu-  
lis & manifestum fiat, vel falcem in alienam mitten-  
do messem, vel per varia scientiarum argumenta  
errando, inductionis ope, probationem aggredi ne-  
cessarium erit, cum vel sola servandorum hominum  
disciplina, quod agamus, quod dicamus, scribamus-  
que, abunde suggerat. Ea vero, uti ex sanioris phi-  
losophiæ, quâ naturam ejusque affectiones mutatio-  
nesque scrutatur, fontibus originem trahens, obser-  
vationibus sedulo factis incrementum debet, ita ea-  
rum non neglecta applicatione usuque continuato  
adolescit magis, sensimque ad majus indies perfe-  
ctionis fastigium adspirat. Hisce vero circum-





specie adornandis erectioris viri ingenii nullo non tempore insudarunt, & quæ circa corporum naturalium inque primis humani indolem, conditionem varietatem sensuum ministerio, visusque præsertim annotarunt, editis eam in rem anatomici, physici, medici, pathologici, semiotici, therapeutici argumenti haud contemnendis observationibus, cum erudito communicarunt orbe. Ingens equidem hic notatur discrimen, obvia nonnullis & ex trivio petita, vera, falsa, certa, incerta, visu an auditu cognita corradentibus, aliis non nisi singularia, rariora, admiranda, & felici beata successu enarrantibus, adversos vero & funestos præsidiorum effectus astute celantibus; selecta denique, & veram spondentia utilitatem, tristia pariter & læta, obvia simul & rariora, sed vera utrinque & certa, ita ut eorum quæ ad rem pertinent, nihil temere omittatur, eleganti & concinna ratione tradentibus aliis. Ac licet iis, quæ ab integris collegiis & societatibus litterarum ac scientiæ in primis naturalis incremento dicatis, & seculo superiori ac præsentis in Gallia, Britannia, Italia, Russia & Germania passim erectis, hodieque vigentibus, eorumque membris & fociis sunt profecta observata, palma præ reliquis a multis tribuatur; re tamen penitus expensa fatendum omnino est, in actis, ut communiter vocantur, in ephemeridibus, in annalibus, in miscellaneis istis observationibus, annuo vel menstruo spatio edi solitis vera non raro falsis, incertis certa, utilia minus talibus, rarioribus & selectis proletaria & ubivis obvia, malis misceri bona.





bona. Mirum ut non sit, tantam post observationum  
messum, alios inter, doctissimorum Bigæ Medicorum,  
THEODORO KERKRINGIO, & FRANCISCO HILDESHEIMIO,  
illi quidem anatomicum huic vero pragmaticum  
conficiendi spicilegium relictam esse provinciam.  
Neque vero etiam nunc, neque in posterum inventis,  
dictis, enarratis, observatis aliquid addendi deerit oc-  
casio. „Multum enim, verba sunt SENECAE: egerunt,  
qui ante nos fuerunt, sed non peregerunt, mul-  
tum adhuc restat operis restabitque multum. Na-  
tura enim, studio quasi quærentem fugit, & oc-  
cultat, quod ostendat revisenti. Veniet tempus,  
quo ista quæ nunc latent in lucem dies extrahat, &  
longioris ævi diligentia.

*obs. anat.  
d. aff. cap.*

*Quæst.  
Nat. L.  
VII, CXXX.*

## OBS. II.


In historia naturali & medica Indiæ orienta-  
lis non deficit spicas post messum colli-  
gendi materies.

## SCHOLION.

Illos inter, qui de aëre, aquis & locis Indiæ orienta-  
lis id quod sensibus usurparunt, litterarum monu-  
mentiis comprehensum memoriæ prodiderunt,  
JOSEPHVS À COSTA, JACOBVS BONTIVS, WIL-  
HELMVS TEN RHYNE, ANDREAS CLEYERVS, GEOR-  
GIVS EBERHARDVS RUMPHIVS, HERBERTVS DE JÄGER, EN-  
GELBERTVS KÄMPFERVS, ut reliquos, & qui botanica  
figillatim tradiderunt, CHRISTOPHORVM À COSTA,  
CAROLVM CLVSIVM, GARCIVM ab orto & similes ta-  
cea-

*Hist. Nat.  
et mor. Ind.  
Hist. Nat.  
Ind.  
d. moxa e-  
pistol. var.  
add. M. B. V.  
Histor.  
Simpl. Ref.  
Amœnit.  
exot.*






*Itiner. Ori-  
ent.*

*Ind. literat.  
proæm.*

ceamus, nec sine elogio commemorandi veniunt. Neque vero itinerum illuc a variis factorum relationes hic prorsus sunt negligendæ. Non pauca enim apud A. OLEARIVM, I. A. de MANDELSLO, I. B. TAVERNIERIVM, I. THEVENOTIVM, I. SPONIVM, DEL- LONIVM aliosque occurrunt scopo nostro appri- me inservientia. Sed uti hæc talia vastis plerumque operibus dispersa non sine labore plerumque colli- guntur; ita post laudatissimos priorum in hoc ope- re conatus, & studia indefessa illud diffimulandum non est, inter multa egregia, uno ore adserta & confirmata non pauca occurrere, quæ lectorem in illa autorum dissensione & repugnantia dubium di- mittunt, id quod doctissimi KÆMPFERI observatio- nes exoticas, quibus complures veritates antea ab- sconditas in aprico posuit, cum reliquis conferenti ad oculum patebit. „ Enimvero illustris Societas „ Indiæ orientalis Belgica, ut M. B. VALENTINI fidem „ facit, non sine laudabili cautela legatos illos, aut, „ ut vulgo audiunt, commissarios ad plantationes „ suas aliosque locos transmittendos primum sacro „ jurisjurandi vinculo adstringit, ut in relationibus „ suis nil nisi veritatem illibatam proferant, quibus „ ea de causa major semper fides adhibenda est. „ Quandoquidem vero & hi tales rerum naturalium „ prorsus sint ignari, atque de iis, quæ ad res mer- catorias mage faciunt, solliciti tantum sint: hinc „ tutius ab eruditis & curiosis in locis indiæ viven- „ tibus ea, quæ studium naturæ artisque medicæ „ concernunt, & ab iis curatius & perfectius explo- „ rari







rari possunt expetere atque expectare possumus. Quem in finem tot membra S. R. I. Academiae Naturae Curiosorum in Germania, Volckamerus scilicet, Schrœckius, Mentzelius (à Potentissimo Borussiae Rege hunc in finem lautissimo stipendio donatus) Schefferus, ut & inclytus Ludolphus aliique cum eruditis in orientali india, Cleyero, Jägero, Rumphio, ten Rhyne, similibusque commercium litterarium aluerunt, quorum observationes & epistolæ jam ex parte in Miscellaneis curiosis occurrunt. Majorem vero lucem illæ nobis litteræ atque scripta foenerari possunt, quæ posteriores in India ipsa orientali inter se reciprocant, quibus se mutuo æmulando, & in multis contradicendo se ad uberiores & curatorem inquisitionem excitarunt, & stimulum non inutilem addiderunt: quo fieri non potuit, quæ alioquin in abscondito mansissent, in apicum deducta fuerint. Sed cum & hi vel præjudiciis forsitan occupati, vel relationibus aliorum nimium confisi fallere & falli potuerint, integrum nobis erit, quid veri falsique hisce relationibus insit, quoad per autopsiam mihi, Respondenti innotuit, per lancem quasi saturam ostendere, non eum quidem in finem, ut, quæ in locis remotissimis congrua deprehenduntur, sanitatis præsidia ad nostra corpora imprudenter applicemus, sed ut ex sollicita omnium, quæ hic occurrunt circumstantiarum collatione judicium acuatur, cujus maximam in languentium medela vim deprehendimus.

OB-





### OBS. III.

Aëris conditio in moderanda Indorum va-  
letudine maximam obtinet efficaciam.


### SCHOLION.

Aëris quænam sit in India orientali ratio, ex situ e-  
jus versus solem discimus. Cum enim æquatori  
vel proxime subjaceat, vel saltem non adeo procul  
ab eodem distet quicquid orientalis nomine Indiæ  
venit, prono inde fluit alveo, id quod autopfia con-  
stat, perpetuum ibi æquinoctium, regionum tamen  
diversitate & majori vel minori ab æquatore distan-  
tia, quam latitudinem locorum, vel & elevationem  
poli appellare Geographi solent, hic neutiquam ne-  
glecta, assiduum adeoque ver, vel si mavis, autu-  
mnum, summamque aëris amœnitatem, optatam-  
que temperiem matutinis præsertim & vespertinis  
horis, sed circa meridiem per aliquot horas æstus  
vix tolerandum, noctu vero frigus sat notabile non  
raro observari, veraque & illa HORATII deprehendi:

Matutina parum cautos jam frigora mordent.

Vnde quid de aëris indici salubritate habendum sit,  
facile patet. „Ex tempestatibus, A. C. CELSO judice,  
„ pessimæ, quæ maxime variant. Quo fit, ut autu-  
„ mnus plurimos opprimat. Nam fere meridianis  
„ temporibus calor: nocturnis atque matutinis,  
„ simulque etiam vespertinis frigus est. Corpus  
L. II. C. I. „ ergo & æstate & subinde meridianis caloribus re-  
„ laxatum





„ laxatum subito frigore excipitur. Sed ut eo tem-  
„ pore id maxime fit, quodocunque evenit, no-  
„ xium est. Videlicet, ut OVIDIVS auctor est:


Cum modo frigoribus premimur, modo sol-  
vimur æstu,

Tempore non certo corpora languor habet.

Apposite hæc, & si quæ sunt aliæ aëris æquinocti-  
alis qualitates ad Indiarum regionem applicat, eumq;  
argumentis non contemnendis minime siccum, sed  
humidum valde in circumjacentibus insulis non so-  
lum, sed & in continentis regionibus deprehendi,  
JACOBVS ostendit BONTIVS, qui de aëre, qui circa Ba-  
taviâ occurrit, sigillatim sequentem loquitur in  
modum: „ Aër in circumvicina regione non admo-  
„ dum salubris existit, tum, quod calor & humidi-  
„ tas putredinis effectrices & genitrices physicis di-  
„ cantur, tum propter stagna & loca paludosa hic  
„ frequentia, dum enim venti e montibus spirant,  
„ foetidos & crassos, ne dicam, propter multitu-  
„ dinem insectorum veneratos vapores supra ur-  
„ bem nostram adigunt, ac ita aërem inficiunt, ita-  
„ que ventus e continenti oriundus serio nobis ca-  
„ vendus est, atque is præcipue qui post gallicini-  
„ um e montibus spirat, ob primarum vigiliarum  
„ tepidum calorem ac aperta inde in homine suda-  
„ ria, seu corporis poros, vehementius propter sub-  
„ tilem & penetrantem qualitatem corpus afficiunt,  
„ quam vel frigidissimus Boreas media hyeme in  
„ patria. Quo eodem loco duo anni tempora, æsta-  
tem pluviosam & hyemem siccam, calore ob solem

*Hist. Nat.  
& Med.  
Ind. or. L. I.  
Dial. I.*





a linea æquinoctiali non longe recedentem plerumque semper æquali existente in Indiis, his quæ sequuntur verbis constituit, fusiusque describit:  
„ Æstas incipit, ubi perpetuæ pluviæ cadere incipiunt: nam tum sol propior æquatori e directo nos feriens, ac e mari, paludibus & stagnis nubes in altum cogit, incipitque hæc tempestas a Novembris initio ac usque initium Maji excurrit, cœlo tum temporis tam irriguo, ac tam pluvioso, tum cadentibus tam continuis pluviis, ut insolitis merito secundum Deucalionis diluvium metuatur.  
„ E contra a Maji initio usque ad Octobris exitum ficcus plane & serenus est aër, vix pluvia toto sex mensium intervallo decidente contrario plane modo, quam in patria nostra, ubi recedente sole pluviosus fit aër, appropinquante vero sole ficiorevadit. Et de anni quidem temporibus pluviisque in India cadentibus diversæ occurrunt, & repugnantes invicem relationes. Idem quod J. BONTIUS modo de Java sua, J. H. SEYFRID de Cambaja & littoribus Malabaricis affirmat, sed mox addit eo, quo hyemalis in dictis littoribus occurrit, id vero est pluviosa tempestas, in littoribus Coromandel æstatem ficcam vigere, utroque, ut ipse LINDSCHOTTI utrinque fide nixus, addit, loco sub eadem poli elevatione fitis, & vix. 30. 40. 50. aut 70. miliaribus in vicem distantibus. Suratæ vero tres anni partes J. A. de MANDELSLO, calidam, Februario, Martio, Aprili & Majo, pluviosam Junio, Julio, Augusto & Septembri, frigidam denique Octobri, Novembri, Decembri

*Medull.  
Mir. Nat.  
p. 521. sq.*

*itiner. Ind.  
or. L. l. c. 9.*





bri & Januario mensibus notavit; cujus quidem rei veritatem ego, Respondens, per integros novem annos in Bengala, eadem fere cum Surata latitudine gaudente commoratus, toties deprehendi, hoc tamen adjuncto discrimine, quod æstus initium Martium, ejusque finem Junium, pluviarum initium Julium, finemque Octobrem, frigoris vero qualiscunque initium Novembrem finemque Februarium menses, ventosque illic ex oriente & meridie, istic ex occidente, hic vero ex septentrione plerumque spirantes videre mihi licuerit. Reliquas quod attinet regiones, illud notatu videtur dignum, quod eo, quo in Bengala & vicinis regionibus pluviae desinunt, tempore, in Java initium capiant, Novembris nempe initio, & usque ad Februarii finem mensis continuent, reliquis octo mensibus perpetuam æstatem referentibus; eo vero, quo hic pluviae desinunt tempore, Martii nempe initio mensis in oris Cormandel illæ iterum cadere incipiant, & usque ad Junii finem perdurent, reliquis octo mensibus perpetua iterum æstatis temperie, æstu & siccitate conspicuis. Quæ si recte æstimentur, ut autopsia mihi constant, ea, quæ supra ex aliis sunt citata, non parum illustrabunt. An vero LINDSCHOTTI et SEYFRIEDI, tempestates in Malabariæ & Coromandel oris eadem latitudine gaudentibus, & non multum ab invicem remotis, sibi e diametro contrarias adferentium fides in dubium vocari debeat? affirmare non audeo, qui Coromandel, non autem Malabariæ oras visitavi, sed si per analogiam argumentari licet, simile quid in Java & Suma-



*Schol. obs.*  
*XX.*

tra insulis mihi deprehendere visus sum; hæc enim cum æquatori sit proxime subjecta, perpetuis fere pluviis integro anno madet; illa vero sex gradibus ab æquatore remota, sed magis ad orientem vergens non nisi per quatuor menses pluviis, per reliquos octo menses siccitate gaudet. Simile prorsus exemplum infra de America occurrit.

#### OBS. IV.

Victus ratio Indis familiaris & vitæ genus valetudini ipsorum non parum velificatur.


#### SCHOLION.

*l. c. Dial.*  
*II. III. IV.*  
*V. VI. VII.*

*l. c. Dial. VI.*

Alimentorum ex animali & vegetabili regno pro-  
fectorum, omnis generis carnum, volatilium,  
domesticarum, ferinarum, quadrupedum, piscium,  
olerum, plantarum, radicum, & aromatum in primis  
Indiam orientalem esse feracissimam, neque potu-  
lentis saporis suavitate & virtutis præstantia, conspi-  
cuis destitui, tum aliunde constat, tum a BONTIO ite-  
rum docemur, qui plerisque & alimentis & condi-  
mentis, & potulentis, in India usitatis fuisse enarratis,  
„ Quid, pergit, jam postremo tibi memorem mala  
„ aurea, citrea, granata, & cæteros similes fructus,  
„ quorum summa est copia, cum ista in nostra Eu-  
„ ropa notissima sunt. - - Vites taceo, quæ si di-  
„ ligentem putatorem & cultorem nanciscantur,  
„ quater in anno maturos suos fructus proferunt.  
„ Itaque, si diurnus calor non adsit, propter per-  
petuum







, petuum virorem semper hic ver, ac veri hesperi-  
dum horti. Sed ut pagani Indiarum indigenæ  
vaccarum adorant simulacra, quin &, ut I. A. de  
MANDELSLO fidem facit, vitulis nuptias ingentibus  
non raro sumptibus parant, rati, animas propinquo-  
rum facto e corpore excessu in hæc forsan animan-  
tia per metempsychosin quandam Pythagoricam  
transiisse, cujus quidem philosophiæ rudera in Indi-  
is hodieque superesse, laudatus modo BONTIVS eo  
confirmat, quod Indi etiamnum abstineant fabis  
rubris, & quicquid inter herbas rubrum colorem  
obtinet. Ita a butyro, vaccina, vitulina quin & omni  
carne sunt abstemii, vita existimantes animantia,  
quam illis non concesserant, neutiquam privanda  
esse, paucis oleribus, salis & olei momento additis,  
lacte, pane ex arbore sagvvera parato, & præter  
pisculos paucos, varii generis fructibus, inque primis  
oryza cum aqua simplici, quæ ipsis cibi potusque lo-  
co sufficit, contenti. Olerum vero & fructuum  
cum varia admodum genera in Indiis proveniant,  
pro varia eorum qualitate, usu & abusu vario varios  
expectandos esse effectus, in aprico est. Hæc vero  
ut de paganis & plebejis Indiarum incolis in primis  
valent; ita & Aethiopes, qui rerum ibidem potiti  
sunt, & advenæ Europæi eo lautius vitæ genus ple-  
rumque sectantur, vino peregre advecto, aromatibus  
ibidem maxima in copia provenientiibus, omnis  
generis carnibus, pennatis in primis, ferinis & do-  
mesticis, varii generis piscibus, fructibus, oleribus-  
que diversis, quin & pane ex tritico, Japonia & Su-  
ratta

*l.c. L. IV.  
c. XII.*

*l.c. Dial.  
VII.*







*L. c. Dial.  
III.*

*Obs. Castr.  
Hung.*

*Lappon.  
C. XXV.*

ratta advecto, & cerevisia ex illo frumenti genere, quod Belgis mout vocatur, paratis, ut BONTIVS iterum refert, mensas instruunt, imo comestiones & com-  
potationes quotidianas instituunt, theæ ex China allatæ, granorum Coffee partim sponte ibi provenientium, partim ex Natolia & Japonia advectorum, & nicotianæ sacharique, utriusque indigeni, partim ex occidentali India advecti usu abunde delectati. Ex hisce invicem collatis satis, opinor, patet, sanitatem Indos minime perfectam & constanti gaudere, & ævi plerumque brevioris esse, quod utrumque communis rerum usus & attenta confirmat observatio. Præterquam enim, quod aëris varia conditio singulis propediem diebus ibidem obvia maximum sanitati detrimentum inferat, æstusque circa meridiem maximus vel ideo valetudini sit noxius, quod pori corporis nimium aperti, accedente vespertino & nocturno frigore & rore noxio corpori minus probe tecto matutino tempore illabente importune claudantur, simili propemodum modo ac de aëre hungarico de die exquisite calido imo fervido, noctu vero ultra modum frigido, utriusque vero noxis elegantes admodum observationes penes TOBIAM COBERVM legere licet; cum ex adverso Septentrionales populi, aëre horrido & gelido utentes, inque iis Lappones tamen si aspere duriterque vivant, tamen commodissima utantur valetudine, ut Medicos nec habeant, nec iis se indigere existiment, ut a IO. SCHEFFERO fusius relatum extat: alimenta Indis usitata sanitati non æque conducunt. Licet enim victus sim-  
pli-





plicissimus omnium consensu sit optimus, oryzam tamen, calidam inprimis adsumtam non solum noxiam esse ventriculo, verum cerebro ac universo nervorum generi, ut a vaporibus crassis & ficcis ex hoc cibo in cerebrum elevatis nervi optici sæpe in tantum obstruantur, ut cæcitas inde oriatur, alios inter, rerum usu id confirmante, præclare iterum BONTIVS ostendit. Famigeratum vero potus genus, Arac, quod e liquore nuce Indica contento, ac ex ipsa arbore destillato cum oryza conficitur, vel ob mangonii suspensionem caute usurpandum esse, patet, cum Chineses avarissimi simul & astutissimi bipedum illud in India mixtis holothuriis in mari fluctuantibus parant, quæ excrementa maris Belgæ qualen vocant, eaque tam exurentis sunt caloris, ut solo tactu vesicæ in cute excitent, ut idem Cl. Autor fidem facit. Cerevisiæ vero ex oryza a Japonibus confectæ, & Sakki vocatæ, adque vini Hispanici vigorem & indolem coctæ proprietates & noxas uti in proprio expertus est corpore, ita graphice ENGELBERTVS descripsit KÆMPFERVS. Ac sicut de potu, Sagouer dicto, qui destillat ex arbore non ab simili palmæ Indicæ, JACOBVS affirmat BONTIVS, illum, ut & reliquos potus naturalis species ex nucis Indicæ cavitate, & floribus elicitis frigida qualitate excellere, ac proinde nervis esse infestos, si quis nimia quantitate iis abutatur, præsertim corpore per exercitium aut solis ardorem excalescente, indeque malum corporis habitum, fædum ac luteum corporis colorem, ipsamque paralytin derivat, quæ quidem omnia


*l. c. Dial.  
III. & l. II.  
c. XVI.*

*l. c. Dial.  
III.*

*l. c. Faso.  
III, Obs. XI.*


*l. c. Dial.  
IV.*





omnia rerum usu doctus verissima comperi, ita de pane quem ex arbore Sagowera confici, supra commemoravi, pariter mihi innotuit, illum particulis nutritiis paucioribus instructum esse. Olerum & fructuum in Indiis provenientium ingens equidem est discrimen, pleraque tamen frigidiori sunt qualitate prædita, quibus affatim æstuante corpore ingestis, & notabili aquæ frigidaë, aut alius prædicti potus quantitate affusa, non mirum, si diarrhœæ, dysenteriaë, dolores colici, febres similiaque oriantur mala. Præ ceteris Ananas fructus, ut saporis suavitate & eminentia reliquos fere omnes, ita & nocendi energia superare deprehendi, utpote a cujus abusu commemorata modo & plura alia proficisci vitia, expertus novi. Inter fructus vero salubres & unde solatium aliquod male habentes sibi queunt promittere cum areca cardamomis & calce viva folia betele mista, mundandis dentibus masticatorii loco inservientia, fructus manges. pisanque, & cydonia Bengallensia, bambus seu mambu Sakar, BONTIO laudata, & analepticorum classi merito inferenda, tum fructus in primis poley, & ferre everrendis urinariis viis idonea, & inter reliquas dapes apponi solita, nemini, quod sciam, commemorata neutiquam reticenda duxi; tabaci vero fumum, in locis istis orientalibus plus satis familiarem, cujus usus laudem, crimen abusus habet, vel idcirco tangendum putavi, quod non per fistulas passim usitatas, sed per peculiare machinas, alios inter à KÆMPFERO descriptas & iconibus expressas ita hauriatur, ut oleum quod in nicotiana latet







latet foetidum, & narcotica vi præditum ab aqua interjacente absorbeatur. Reliquum vitæ genus Indis familiare quod attinet, nudi fere omnes incedunt, & paucosq; miseros per dicta victu utentes, & pluviis vix non immerfi labores sub dio plerumq; peragunt, idque non nisi necessitate coacti, cum de mediis vitæ sustentandæ vel in proximum diem sufficientibus securi otium labori præferant, ignaviaque torpescant. Præterea admodum juvenes, & vix quartum, quintum, sextum, septimum, octavum, decimum & duodecimum ætatis annum ingressi, utriusque sexus homunculi matrimonia contrahunt, & quamprimum per ætatem licet, veneri litant, liberisque dant operam, quod ne solus dixisse, aut fabulas narrasse videar, en testem iterum luculentum J. A. de MANDELSLO, hæc talia disertis confirmantem verbis. Hæc vero omnia quantum perspirationem impediendo, vires frangendo, & maturam accersendo senectutem valetudini sint fraudi, non attinet pluribus evincere. CORNELIVS certe TACITVS de pri-  
scis suis germanis longe commemorat alia, in quibus feram juvenum venerem & septam pudicitiam, eo-  
que inexhaustam pubertatem, & quod virgines non festinentur, eandem juventam, similemque proceritatem ex merito laudat, unde & quod pares validis misceantur, robora parentum liberi referant. In-  
dorum vero plurimos vix trigessimum agentes ætatis annum, quem ex arborum forte obviarum, hoc vel illo tempore satarum collatione computare solent, senilem referre canitiem, & vix quadragesimum

*l.c. L. I. C.  
XXXI. p. 59.*

*de Mor.  
Germ. c. 19.  
20. 24.*





—  
 mum annum vivendo superare, non uno documento certior factus sum.

## OBS. V.

Pestilentia vera in Indiis fere nunquam est visa; febres vero acutæ continuæ, exanthematicæ, pestilenciales eo sunt frequentiores, intermittentes oppido raræ.

## SCHOLION.

Ex pestis absentia summam aëris Indici puritatem & salubritatem colligunt nonnulli: ast postea quam curatori facta causarum pestem producentium indagine innotuit, pestem non nisi contagio propagari, penes omnes in confesso est, in aëre quoque purissimo pestis contagium longe lateque grassari, & stragem maximam edere posse. Febres vero intermittentes in Indiis rarissimas esse, I. BONTIVS iterum confirmat, præter unam & alteram quartanam, eamque cum ægro è patria delatam, quæ misserrime in hydropem, & inde certissimam mortem desierit, quæ certam servaret periodum, cum intermissione seu ἀπυρεξία febrem vix se meminisse, affirmans. Cujus quidem rei causa vel in victu Indorum parco, vel in perspiratione aucta, vel in utroque quærenda videtur momento. Harum vero defectum febrium, continuæ acutæ malignæ, largo fœnore resarciunt, quæ eodem teste Cl. BONTIO plerumque

l. c. L. II.  
c. XIV.

l. c.





rumque cum tanto furore invadunt, ut tanquam attonitos de ratione mentis statim dejiciant, & sæpe intra paucissimos dies imo aliquando horas cum phrenitide & continuo delirio ægros è vita rapiant. Ad sunt perpetuæ vigiliæ, vomitus varii coloris præcipue viridis & æruginosæ bilis. Externa rigent. Calor interne cum ingenti siti vitales & naturales facultates depascitur. Præter enim horridam illam & pestinentiallem febrem, quæ 1733. in Batavia decem mensium spatio 35. hominum millia rapuit ab aqua marina per canales in civitatem derivata, & æstus occasione maris, modo accedente, modo recedente hoc vero tempore paludum more hic insignem à cadaveribus aliisque injectis foetorem spirante ortam, duas inprimis febrium ejusmodi pestilentialium species, quoad in Indiis degi, notare mihi licuit: alteram ad sinum Bengalæ quotannis frequentem, & Augusto inprimis mense pluviarum occasione affatim cadentium, Gange fluvio exundante, & juxta cum gentilium cadaveribus eidem injectis, & magno numero innatantibus, & putridum exhalantibus foetorem multis aliis effluviis heterogeneis salinis, tartareis, nitrosis vulgo dictis, & sanitati adeo infestis, ut ferro candente vel & farina fabarum aquam corrigere & potui idoneam reddere studeant, referto revertentem, & pluribus funestam, quam mecum BON-

TRIVS cum singulis notavit circumstantiis; alteram, die Aue sigillatim appellatam, & pustulis nigris in naso inprimis conspicuam. Huic vero posteriori, ut folia arboris cujuslibet obviæ in turundæ formam

*l.c.p.30.40.*






P. P.

coactæ, & cum fœno græco, faleque communi mixta opponere, & ut narium hæmorrhagiam, quam criticam & salutarem in hoc morbo noverunt experti, concitent, naribus ingerere solent hujus regionis incolæ; scarificationem forsan narium Aegyptiacam, Ill. STAHLIO laudatam imitati, ita in reliquis februm acutarum speciebus præter universalia, V. Sioem & cathartica in principio, si opus adhibenda, diaphoreticis & sudoriferis cum debito regimine adhibitis, negotium omne absolvendum erit. Quem in finem præter varias radices & herbas alexipharmacas indigenas, lapide bezoardico, & lapide cordiali Indico, Goæ ex variis simplicibus ejusdem commatis confecto Indi, nostrates vero alexipharmicis quoque usitatis, volatilibus & temperatis, ex coralliis, cancrorum lapidibus, apri dente, unicornu fossili, succino, cinnabari, antimonio diaphoretico, scordio, angelica, vincetoxico, sambuco, scorzonera, contrayerva, serpentaria virginiana ex Europa vel & America advectis & varia forma adhibitis nec sine effectu exoptato utuntur: illud vero silentio non videtur prætereundum, quod Indi harum rerum periti ægrotos febribus continuis laborantes ventilatione sollicitè instituta sudore per aliquot horas data opera prohibeant, deinde vero sudori cum *ἐν Φορίῳ* tuto permittant. Quæ quidem medendi ratio, ut empiricæ simillima appareat, duplici niti fundamento videtur, impeditura nimirum, ne vel cœlo in Indis fervente languentes sudoribus nimium diffluant, vel sudoribus præmature concitatis, vires nimium pro-





profternantur, veletiam, ut homines nudo corpore radios solares impune & absque sudoris colliquativi metu ferre soliti, ad sudorem ejusmodi ventilationis flabello factæ subsidio præparentur ac disponantur, quam in sententiam eruditæ I. H. SCHVLZII meditationes conferri merentur. Variolis vero & morbillis laborantes, quorum exanthematum hisce in locis uberrimus est proventus, aqua frigida strenue perfundi, idque ni fiat, vix, qui iisdem laborant evadere, tum ipse sæpius vidi, tum KÆMPFERVS in Javæ incolis notavit, idque in æstuoso isto climate non adeo absurdum putat.

*Obs. de  
Sudore.*

*l.c. p. 534.*

## OBS. VI.

Nervosi vitia generis, & affectus spasmodici in India orientali frequenter occurrunt.

## SCHOLION.

Hujus quidem causam phænomeni ex aëris vitio vitæque genere Indis usitato juxta prædicta eruere, haud equidem foret difficile; neque vero pestem istam, ut multis solenne est, appellandam peculiaribus antidotis tollendam, sed genuinis quodlibet vitium nominibus indigitandum censui. Hæc inter communissimum omnium & frequentissime obivium, Beriberi dictum, pro paralyseos specie a BONTIO aliisque vulgo habetur, ego vero, hoc ipso nomine illud delirii genus, quando quis absque causa manifesta sibimet ipsi displicet, solitudinem amat, mœrori



*l.c. L. II, c. I.*



l. c. L. II.  
c. II.

mœrori indulget, id vero est, melancholiam hypo-  
chondriacam denotari, experiundo didici, simul &  
diuturno studio vera esse deprehendi, quæ idem ille  
Cl. BONTIVS de Spasmo, & tetano cum primis com-  
memorat; tam repentinum enim & subitum esse ali-  
quando ejus impetum, novi, ut dicto citius homines  
rigidi, non secus ac statuæ, permaneant: dum vel  
in anteriorem vel posteriorem corporis partem mu-  
sculi involuntario motu versus principium suum tra-  
huntur. Hoc malo affecti truculenter admodum  
astantes intuentur præsertim, quod sæpe fit, interve-  
niente spasmo cynico, seu convulsione canina, cum  
utravis maxilla aures versus trahitur. Ruber  
& viridis color ex oculis & facie oritur, dentibus  
strident, & murmur innonditum, vice vocis huma-  
næ edunt tanquam ii, qui è cella subterranea loquun-  
tur: ita ut imperitis vere dæmoniacy appareant.  
Præterea & varii generis doloribus & spasmis in in-  
fimo præsertim ventre sub colici, hypochondriacy,  
quin & hysterici mali nominibus scenam ludenti-  
bus, una cum Sinensibus & Japonensibus misere non  
raro Indos excruciari videas, quæ quidem vitia va-  
riis stipata symptomatibus à flatibus seu vaporibus  
derivanda existimant. Quam in rem egregia sunt,  
quæ Cl. KÆMPFERVS memoriæ prodidit, digna o-  
mnino, quæ hic quoque legantur verba: „Asia quo-  
„ usque ad nostros antipodes extimumve orbis ter-  
„ minum extenditur tribus donata est Heliconibus,  
„ Arabum, Brahmenum & Sinensium: ex quibus  
„ scientiarum artiumque promanavit, quicquid est  
„ inter







„ inter vasti orientis populos. Hi vero cœlo, lin-  
„ guis, moribus, religione distincti populi, licet pro  
„ diverso, ex quo oriuntur, Helicone, alia atque di-  
„ versa foveant artis medicæ (ceteras non attingo)  
„ principia, præcepta, materiam & medendi metho-  
„ dos, nihilominus tamen, cum in morborum cau-  
„ sas inquiritur, uno ore singuli ad tribunal subin-  
„ de, flatus & vapores provocant, ut tantum non vi-  
„ deantur cum Coo nostro L. de Flat. dolores & af-  
„ fectus quoscunque flatibus acceptos referre. Imo  
„ vero ex recentioribus DOMERGERIO, & LANGIO cui-  
„ dam idem placuisse dogma, D. Præses pridem  
„ ostendit. Colicæ sigillatim gentibus hisce infe-  
„ stæ nomine non quemlibet, sed illum ventris dolo-  
„ rem venire, qui dum intestina lancinat, in inguine si-  
„ mul motus excitat convulsivos, a KÆMPFFERO iterum  
„ docemur: „ Nimirum is est hujus colicæ vel gradus  
„ vel genius, ut abdominis quoque musculos &  
„ membranos vellicet. Si doloris causam, vel ma-  
„ teriam quærimus, ea ex sententia horum antipo-  
„ dum, cum in præsentī morbo, tum in omni crucia-  
„ tu ventris neutiquam intra intestini cavum hospi-  
„ tatur, nisi forte in affectu leviori, sed in ipsa hæret  
„ partis alicujus substantia membranosa, puta mu-  
„ sculorum abdominis, peritonæi, omenti, mesen-  
„ terii, intestinorum: in quibus illa per moram fa-  
„ cessens in vaporem, vel, ut loquuntur, in spiritum  
„ sæpe acerrimum rodit & lancinat. Hujus igitur  
„ spiritus rodentis effracto carcere, ipsoque angu-  
„ stiis, quos distendebat, exsoluto, cessabit momen-  
„ to

*l. c. Fasc.  
III. Obs.  
XII.*

*Desiderat.  
Med. p.  
141. f.*

*l. c. Fasc.  
III. Obs.  
XI.*





„ to citius acerbissimus extensionis sensus, quem ut  
 „ perperam Latini ab intestino sæpius innocenti co-  
 „ licam, sic Gymnosophistæ eum ad Japonum Si-  
 „ nensiumque mentem saniori iudicio amant sua  
 „ lingua vocare spasmodum abdominis & intestino-  
 „ rum. Habet hoc singulare patrius morbus Ja-  
 „ ponix, ut ad hystericae passionis exemplum per-  
 „ sæpe suffocationem hospiti suo machinetur, con-  
 „ vellendo totam regionem ab inguine ad usque co-  
 „ stas spurias, vel mucronem; deficiat vero, ubi  
 „ diu sæviit, in tumores hic illic in corpore promi-  
 „ scue nascentes, nonnunquam epilogum ludat te-  
 „ rrimum.

### OBS. VII.



Alvi fluxus simplices & cholericæ, hepatici  
 & dysenterici in Indiis sunt frequentis-  
 simi.

### SCHOLION.

*l. c. L. II.  
 c. III.*

**P**lures inter alios idem mecum notavit BONTIVS, qui  
 dysenteriam in primis horribile vocat, & consue-  
 tissimum his regionibus malum, quod plures homi-  
 nes necat, quam affectus quispiam alius præter na-  
 turam. Hoc vitium contrahi existimat, partim ex  
 aëre calido & humido, sed & fructus supra laudatos  
 maximum huic malo fomentum præbere addit, qui-  
 bus si quis cum summa cautione non vescatur, &  
 cum oryza vel pane & paucis salis, vix unquam hoc  
 malum effugiet, non secus, quam in Gallia & Hispa-  
 nia,





nia, qui uvas avidius sine pane vorant, statim diarrhœam vel dysenteriam incurrunt, præcipuam vero malicauſam allegat potum arac, mangonio dicta ſupra ratione corruptum. Aëris tamen potiores hic eſſe partes, non tam calidi vel frigidi, humidi vel ſicci, ſed ex calido in frigidum, ex ſicco in humidum ſubito commutati, ex ſimilium indole mutationum aliis quoque in locis notanda, aliarumque analogia regionum concludere licebit; nam & de Pannonia ſua idem affirmat, & hoc præ reliquis malum incolis ejusdem infeſtum TOB. TOBERVS graphice deſcribit, & cur in illa aliisque regionibus menſe cum primis Auguſto epidemica & maligna oriatur dysenteria, non niſi ſubitæ aëris hætenus fervidi in frigidum mutationi in acceptis ferendum eſſe, tum uſus rerum docet, tum in ANNAL. PHYSICO-MED. VRATISLAVIENSIBVS egregie evictum & demonſtratum eſt. Radicem Bimili patna dictam & laxandi, hinc roborandi virtute præditam huic inprimis malo opponere norunt Indi harum rerum gnari. Primæ nimirum digeſtionis vitio hæc & ſimilia eveniunt mala, affectus mordehi, quo ventriculus depravatus, & mordexin, quo naſea & vomitus perpetuus denotantur, ſæpius in India oriuntur. Ciborum vero in ventriculo reſolutionem, in aëre ultra modum fervido minus ex voto perfici, indeque temperantia in locis & temporibus æſtuantibus inprimis opus eſſe, I. A. DE MANDELSLO opportunè notavit, V. Cl. vero G. A. HAMBERGERVS peculiari labore egregie demonſtravit.



D

OBS.

l. c.

1719. Aug.  
p. 183. 188.l. c. p. 37.  
d. Ventric.  
per æſt. imb.





## OBS. VIII.

Phtifis, Hydrops, Icterus, dira illa mala, Indorum plurimis infesta, multis funesta sunt.


## SCHOLION.

**H**ujus rei fidem tot inter alia funera hominum, ut supra dictum, præmatura morte defunctorum faciunt: viam quippe ad lethum his similibusque vitis sternentibus. Ista vero in pulmone, hepate, mesenterio, omento, & reliquis visceribus derivationi & secretioni humorum dicatis radices cum agnoscant, horum quidem viscerum inflammationes, exulcerationes, obstructions, ut vulgo vocantur, aut alio modo factæ corruptiones ex aëre & victu Indis familiari, vivendique ratione perversa supra pluribus enarratis derivanda erunt. Et Icterus quidem seu regium morbum inter quotidianos in India morbos numerat BONTIVS, qui vel alios morbos, inflammationem, scirrhum, apostema hepatis comitatur, vel sequitur, & quia tum ut plurimum symptomaticus, & ex violentia morbi ortus, fere semper lethalis, sæpe etiam ita momentaneus est, ut intra paucissimos dies oriatur & occidat. Diuturnus autem sæpe delirium & phrenitidem, & neglectus certissimum hydropem, quem familiarissimum in Indiis morbum, sed facilis ibi quam aliis in locis sanabilem vocat, infert; phtisin vero, empyema, hæmoptysin, & similia pectoris

*l. c. L. II.  
c. X.*

*l. c. L. II.  
c. XI.*





toris vitia ex aëris constitutione calida & humida in corporibus in primis nudis improvide eidem, aut rori cadenti expositis derivanda existimat. Inter reliquas vero mali corporis habitus species Indis admodum familiares duas cum primis a Cl. KÆMPFERO notatas deprehendimus, Andrum & Perical malabaricæ regioni endemias & communes, quarum illa oscheohydrocelen, hæc vero pædarthrocacem quandam, seu spinam ventosam, vel & hyperfarcosin pedum ulcerosam denotat; cujusquidem utriusque mali causam liquoris fundi malabarici potatoribus eodem jure refert acceptam, quo plica polonica accusat fontes Vcraniæ, Strumas propinat Styria & Transylvania, Dracunculos ex stagnante imbre hauriunt Arabes desertorum, accolæ sinus Persici, & Guineensis Afri.

*l. c. L. II.  
c. XII.*

*l. c. Fasc.  
III. Obs.  
VII. VIII.*

## OBS. IX.

Dracunculi non postremum pathologiæ animatæ caput apud Arabes, Persas ipsosque Indos constituunt.



## SCHOLION.

Singulare lumbricorum genus Dracunculi sunt cum Crinonibus, germ. miteffer, pueris infestis, & M. ETTMÜLLERO laudatis neutiquam confundendi, qui non in intestinis, aut alia quadam corporis cavitate, sed in musculis per corporis ambitum natales inveniunt. Horum jam PLVTARCHVS, & ex eo

*Oper. fin.  
A. E. L.  
1682.*

*VIII. Sym.  
pof. 9.*





*Var. Lect.*  
*II. C. XX.*  
*Hist. Æth.*  
*de Vena*  
*Medin.*  
*l. c. Fasc.*  
*III. obs. IV.*

*l. c. p. 527.*

H. MERCVRIALIS meminit. JOBVS VERO LVDOLPHVS & GEORGIVS HIERONYMVS VELSCHIVS uberiores eorum descriptionem dederunt. Omnem vero morbi historiam, una cum causis & medendi methodo ita tradidit E. KÆMPFERVS, ut vix quod addi possit, inveniatur. Nam & aquarum impurarum & vermiculis scatentium usu minus provido externo pariter & interno malum plerumque contrahitur, nec nisi emplastris emollientibus loco affecto applicatis ut lumbricus infixus suppuratione sensim proluciat, curari consuevit. Ac ne quis obvertat, nihil huic lumbrico cum Indis intercedere commercii, alius quippe terræ incolis infestum, idem ipse Cl. Autor de patria ejus sequentem disserit in modum:

„ Non est bestiola hæc soli Persidi vernacula, sed &  
 „ Guineæ in Africa, & Rhase ac Avicenna testibus,  
 „ Chorasmiæ & Aegypto quoque. Medinensem Arabiæ tractum earum feracem testatur sæpe laudatus Arabs, & morbum sub hujus patriæ titulo ex  
 „ instituto pertractat gemino capite 21. & 22. Lib.  
 „ Can. 4. Fen. 3. Tr. 2. Dracunculorum genitricem  
 „ quoque offendi pagos mediterraneos quosdam  
 „ terræ Gangeticæ ultra Paliacattam,


## OBS. X.

Arthritidis & Nephritidis exempla paucissima in Indiis reperiuntur.

## SCHOLION.

Hujus veritatem observati non rectius, quam scriptorum





ptorum silentio, autopfia & experientia propria, & quæ contra utramque moveri poterant, dubiorum resolutione in tuto collocavero. Nimirum, qui contrariam tuentur sententiam, quid olei cajeputi ex Indiis ad nos delati, & in ANNALIBVS VRATISLAVIENSIBVS, virtute nervina, antopoplectica & antiarthritica passim celebrati, quid moxæ, famosi adeo podagrici a BVSHOFIO, TEN RHYNE, VALENTINI, KÆMPFERO, aliisque pluribus expositi virtus, quid folia Acmellæ a VALENTINI, quid Kithie folia ex Indiis allata, & in ANNALIBVS iterum VRATISLAVIENSIBVS, ceu calculo pellendo idonea præsidia, quid plura alia exotica & quamobrem ad hosce morbos adeo commendantur, & tantis ornantur elogiis, si morborum, quibus opponantur, nulla reperiuntur in istis regionibus vestigia? quærere solent. Ast dubiis hisce diluendis unus iterum sufficit Cl. KÆMPFERVS, qui de Moxa erudito instituto sermone hisce alia inter verbis usus est: „Adversus Arthritidem & ejus progeniem podagram schiaticamque quid valeat moxa, id non ita pridem coloni Batavi in Indiis exploraverunt. „Frangit hic ignis impacta perioestio rhenani tartari spicula,; quæ quidem singula & quæ sequuntur, ad Indos abstemios neutiquam applicari possunt. Quod vero ad nephritidem seu calculi attinet historiam, in isto hominum genere, qui cerevisiam vernaculam ex oryza coctam, Sinensibus Sampsu, Japonibus Sakki vocatam in delitiis habent, invenire qui vaga arthritide & stranguria laborant, insolens non esse, idem ille doctissimus vir autor est. Imo ve-

ro

1723. Nov.  
p. 568.



l. c.

Mus. Mus.  
Prax. Chir.  
p. 338.  
1720. Nov.  
p. 686.

l. c. Fasc.  
III. obs. XII  
p. 594.

l. c. p. 626.





1666. p. 190

ro arthritidis vagaplethoræ plerumque soboles a fixa multum omnino distat, neque qui stranguria tentantur, calculo mox sunt affecti. Ac sicut apud thea bibulos Japonenses & Sineses isto quidem cœlo KÆMPFERVS & THEVENOTVS, ut est in ACTIS PHILOSOPHICIS, ita & ego penes hydropotas Indos calculosos & podagricos nunquam inveni. Quod si vero in Indiis hisce malis affecti reperiuntur, sunt isti Europæi, & Bacho, aut veneri ultra modum litantes, aut alia propria vel aliena culpa malis hisce, graviter interdum, mulctati.

## OBS. XI.

Lues venerea malum est in Indiis frequentissimum, lepra vero, quæ vulgo audit, cum lue venerea paria facit.


## SCHOLION.

*op. ad C.  
Mentzel.  
l. 6. p. 116.*

*L. I. Obs.  
LXXII.*

**L**uem veneream Indiæ & Javæ sigillatim inquilinam esse, adeo ut febre quotidiana sit vulgatiores A. CLEYERVS affirmare nullus dubitat, idemque de Goa I. A. de MANDELSLO confirmat, cujus quidem adserti veritatem ego quidem plus satis deprehendi. Ista vero lues Indica nonnullis vocata, ut veneris vagæ & fœdæ flagellum ab intelligentibus merito appellatur, cujus quidem schema a doctissimo I. N. PECHLINO vivis coloribus depictum exstat; ita malum id esse antiquissimum & longe ante detectam frequentatamque Indiam, vel occidentalem vel orientalem, in ea mo-





morum corruptela, & lasciviæ indies auctæ fomite  
ubivis fere terrarum radices egisse, ac latius sparsum  
esse, neque adeo causam adesse, patet, cur primam e-  
jus originem ab esu serpentum Inguanarum, Ame-  
ricanis familiari, vel aliunde cum M. LISTERO derive-  
mus. Ac licet negandum non sit, per contagium  
foedum hoc malum innocentibus quoque communi-  
cari, & longe lateque propagari posse, longe tamen  
hæc rarissima, omnium vero frequentissima eorum  
esse exempla, qui propria culpa & immodico atque  
impuro concubitu sibi id accersiverunt, sanioribus  
pridem innotuit. Equidem an HIPPOCRATI, GALE-  
NO, & reliquis, qui sunt superstites Autoribus priscis  
Græcis & Latinis venerea lues hoc saltem nomine,  
cum de re ipsa nullum sit dubium, innotuerit, non  
attinet pluribus disquirere. Neque vero ex sacris  
aut profanis scriptoribus ad luis antiquitatem vene-  
reæ probandam testimonia cumulare, præsentis fert  
ratio instituti. Notatu tamen digna videntur hæc  
ANONYMI cujusdam Galli verba : „ Il'y a tout lieu de  
„ croire, que cel mal est aussi ancien, que le monde,  
„ & si on lit avec reflexion les debauches, & ensuite  
„ le doleurs, que Tacite, & Suetone Tranquille at-  
„ tribue à Tibere; on peut assurer, qu'il n'avoit pas  
„ mal de Naples, mais celui de Caprees, lieu de ses  
„ divertissemens & de ses plaisirs ordinaires. Qui-  
bus cum GVIDO PATIN, & NICOLAVS de BLEGNY pror-  
sus consentiunt, quorum hic verisimile etiamnum  
existimat, lepram confirmatam, cujus tanquam affe-  
ctus rarioris meminerunt, curationem nequaquam  
ad-



*Ex. med. de  
lue vener.*

*des malad.  
vener. p. 301*

*Lettr. p. 385*

*Zod. Gall.  
Ann. V, p.  
102, f.*






p. 259.

de Xenod.  
XI. XII.

Præf. B. Al-  
bin. diff. ep.  
ad A. Cleyer  
1683.  
l. 6. L. XI.

admittentis eandem esse cum ea quam nos proprie lepram vocamus: cæteras lepræ simplicis species, quas tanquam admodum vulgares tradiderunt, nihil aliud fuisse, quam varias impressiones à salibus venereis cuti inductis, quandoquidem affeclam habebant aut sequacem maximam partem accidentium luis; eademque de causa Indos præ libidine, cui brutorum in morem indulgent, effrænata, luis magis obnoxios esse: vehementiam porro æstus plerasque illas regiones torrentis, ejus accidentia magis terrificæ, & conspicua proferre, fervore vehementiori sanguini inducto. Hæc si rite examinentur, & sicut a D. Præsidente nuper est indigitatum, diversi inprimis luis gradus, probe attendantur, nullum facile dubium remanebit, quin luem veneream & lepram unum eundemque esse affectum, asseramus, & elephantiam pariter lavæ novam, a I. C. MENTZELIO C. F. descriptam, & tophos & gummata & ulcerationes in Insula Amboyna & moluccis præcipue, amboynse Pocken dictas BONTIO notatas, ad luem veneream jure meritoque referri, cum in utriusque historia morbi, & quæ de lepra vulgo dicta, passim occurrunt observationibus autores earum disertis confiteri soleant verbis, quod multum utrumque inter morbum commercii intercedat. Opportune hic recordor Respondens viri honoratioris Batavi, in supremo Indiæ senatu assessoris, cui oblepræ, cujus accusabatur, suspicionem, pulvinari, ut fieri solet, domum transmissio locus in curia denegatus est, eo vero oculari inspectioni ad desiderium proprium sub-





subjecto, non lepræ, sed luis suspicionem veneræ justam esse, innotuit. Præterea & leproforii recorder Indici, in insula Purmerent prope Bataviam fundati, non, ut in Europæ variis regionibus fieri amat, leprosis omnibus destituti, sed ægrotis & languentibus quam maxime referti; sed & curatori instituto examine innotuit mihi, plerosque lubentes incurabilium classi adseri, ut nimirum victu & amictu & reliquis necessariis vitæ adminiculis otiosi abunde fruantur: nec qui curam eorum gerunt, chirurgi aliam quam palliativam instituunt, neglecto fonte rivulos, id est, ulcera, tubercula & similia vitia emplastris, unguentis aliisque topicis superficietenus saltem tractantes. Ipsam vero quod attinet luem, Indi quidem eam applicato cinnabaris vulgaris factitiæ suffitu & pulvere radice chinæ in substantia, ut dicitur, adsumpto, similique diætâ sicca eventu satis felici expugnare solent, penes Aethiopes autem & Europæos, decoctorum ligneorum & mercurialis ope salivationis, curam ejus aggredi, ut passim alibi, moris est, neque nisi errore aliquo ab ægroto vel medente commisso, & regimine in primis calido nimis adhibito, tristis aut minus felix in cura successus memini.



## OBS. XII.

Nosocomia in Indiis diversi admodum generis reperiuntur.

E

SCHO-





## SCHOLION.

Varia admodum sunt, quæ de Indiæ & regionum vicinarum nosocomiiis litterarum monumentis concepta leguntur. Præterquam enim quod brutorum quoque nosocomia illic offendi THEVENOTVS & MANDELSLO fidem faciunt, E. KÆMPFERVS in describendis Persarum xenodochiis multam posuit operam, quibus tamen repetendis eo immorabimur minus, quod non tam nosodochia, quam hospitia vulgaria hoc nomine a Cl. Autore indigitari, constet, nec quæ de nosocomio turcico, arci sanctiori (Serail) incluso & ægrotis non tam veris quam putatitiis, & Bacho venerique inhiantibus, frustra nitente exquisitissimo Imperatoris, ejusque ministrorum rigore refertissimis, lectu jucunda apud I. B. TAVERNIER occurrunt, cum ab Indis nostroque scopo sint remotiora, huc transcribemus; Quæ vero de Nosocomiiis Batavorum in India, & Javæ metropoli Batavia ab eodem autore commemorantur, scopum nostrum propius attingunt, præsertim cum satis abjecte de iisdem sentiat, & viliores ejus conditionem vivis depingat coloribus, quam eorum, qui curam ejus gerunt, avaritiæ & morositati acceptam refert. Quæ quidem omnia, paucas si exceperis circumstantias, verissima deprehendi, neque, hic saltem causam inveniri, cur fidem TAVERNIERIO, ut ab aliis factum esse, penes M. F. LOCHNERVM, & M. B. VALENTINI videre est, in dubium vocem. Sed & meliorem longe Bengalen- sium conditionem nosocomiorum, quoad victum, & mi-



*Itin. III.*  
*p. 21. 24.*  
*p. 32.*  
*l. c. p. 729.*

*Beschreib.*  
*des Serails*  
*p. 13.*

*Hist. Ind.*  
*Belg. p. 113.*

*Mungos A-*  
*nim et Rad.*  
*Ind. Litter-*  
*at. p. 542.*





ministeria ægris necessaria, expertus novi. De Goæ  
vero Nosocomio ægrorum commodis satis idoneo  
I. A. de MANDELSLO conferri meretur.

*l. c. L. II.  
c. V.*

## OBS. XIII.



Medicina in Indiis est empirica.

### SCHOLION.

Scholis, litteris, & reliquis eruditionis subsidiis de-  
stituti Indi medendi præcepta ab antiquissimis  
temporibus à majoribus per traducem accepta in  
posteroribus iterum propagarunt, more pristinis tem-  
poribus solenni, quibus ars salutaris certis familiis  
quasi propria adhæsit, unde medicæ sacris artis  
initiati medicorum filii procul dubio hodieque ap-  
pellantur. „Hi enim homines, quam exercent ar-  
tem non libera electionis voluntate, sed nascendi  
„sorte profitentur, quæ unicuique honores, servi-  
„tutem & spartam denique, quam hac nascendi spar-  
„ta exornet, necessitate plus quam stoica dispensat,  
„inde est, quod per continuos ætatum & generum  
„gradus ac successiones parentes liberis quasi de ma-  
„nu in manum tradant, quæcunque ad artis illius,  
„quam nativitatis lex ab ultima temporum memoria  
„huic aut illi generi præscripsit, perfectionem requi-  
„runtur,“ sicut hæc talia HENRICVS VAN REEDE TOT DRA-  
KENSTEIN fusius persequitur. Illa vero rudis admo-  
dum, omnium est consensu, paucis herbis, simplici-  
bus, decoctis, constans. Indorum enim Medicos ple-  
rosque egregios esse botanicos, tum ejusdem, tum

*Horti Ma-  
labar. P. III  
præf.*





*l. c.*  
*l. c. p. 12.*

*Q. P. p. 763.*


*l. c.*

*Schol. ad  
Obs. VI.*

*Spec. Med.  
Sinica.*

BONTII fide constat. Cauteriis autem & frictionibus ut indulgeant, phlebotomiam tamen abominantur, quam Indi cum Sinensibus gravissimum quondam errorem autumarunt, & jejuniis potius, aliisque refrigerantibus, sanguinem ad debitam temperiem reducere conantur, ajunt enim non ideo quod ferveat in olla, effundendum jusculum, sed si compescere velis, ignem subducendum, sicut insigni empiriæ Indiæ documento ex MARTINI MARTINII Historia Sinica SIMON PAVLI commemoravit. Horum vero simplicium ope auxiliorum morbos magna felicitate & brevi tempore, adjuvante sine dubio cœli benignitate, & incolarum temperantia curari, & gentem inter Chinesem, ut summe industrios œconomos, ita & artis usu salutaris inclytos medicos reperiri; & esse illis libros antiquissimos de natura & virtutibus herbarum, arborum & lapidum, modernosque illius nationis medicos, non secus ac fecerint antiqui, scribere de prognosticis, causis, effectibus morborum, EX THEVENOTO IN ACTIS PHILOSOPHICIS ANGLICANIS relatum exstat. Quæ quidem licet insignem sapere videantur theoriam, paria tamen facere videtur cum flatuum & vaporum pathologia, Arabibus, Brahmenis & Sinensibus propria, supra laudata. Eundemque in censum venire videtur sollicita illa, quin superstitionis & fallaciæ plena pulsus contrectandi ratio, Chinesibus Indisque familiaris & plures inter alios ab ANDREA in primis CLEYERO singulari labore exposita. Quam in rem egregiam Viri doctissimi D. G. MORHOFII ἐπιχειρίδιον plane in rem nostram facientem







tem hic legere juvabit. Postquam enim Philosophiam Chinenſium ad Pythagoricam de numeris, ſymbolis, characteribus, lineis, doctrinam pertinere, oſtendit, ita pergit: „ Similia ſunt illis pene & longe petita in re medica principia, ubi omnia anatomæ ſignari ſuas tamen de venis obſervationes omni Medicorum choro inauditas tradunt; de pulſibus nescio quæ meteora comminiſcuntur, quibus tamen mirifice illi, ut fama eſt, proficiunt. Nam & ſedes & cauſas morbi ſolo pulſu explorant, ac feliciter nonnunquam pronunciant ac medentur, ut vel hinc pateat, de Medicis etiam verum eſſe, quod de vatibus non nemo: omnium optime qui conjecerit, hunc vatem perhibeto optimum. Andreas Cleyerus aliquis nuper myſteria hæc nobis revelavit, quæ ubi in lucem protracta ſunt, riſum potius, quam applauſum merentur, ac merito pudorem illis incutiunt, qui Europææ Medicinæ hujus perfectionem objicere non ſunt veriti. Quantumvis vero plura empiriæ medicæ Chinenſis exempla paſſim proſtent, non poſtremum tamen videtur, quod ex MARTINIO iterum SIMON PAVLI citat, ejus rei ſequens eſſe documentum: „ Artis chymicæ Profeſſores & hic non rari ubique vagantur, non aurum modo pollicentes, ſed & immortalitatem in hac vita, quorum pene idem, qui Europæorum ſcopus eſt, ſplendide mentiri ſcilicet, & nimium credulos avarosque iſtis officiis fallere. Et immortalitatis in hac vita avidiſſime inhiantes eſſe Indiæ incolæ, & ab

*Pol. Phil.*  
*p. 14.*

*l. 6.*





*l. c. p. 131.  
Hist. Frag.  
P. IX. p. 654  
660, seq.*

ab impostoribus alchymistis frequentissime falli, tum  
I. A. DE MANDELSLO fidem facit, tum de Chinæ Impera-  
toribus, immortalitatis poculo moriendi necessita-  
tem, licet frustra, effugere annisis Cl. J. HÜBNERVS  
testis est.

## OBS. XIV.

Indorum medicinæ multum inest supersti-  
tionis.



## SCHOLION.

*l. c. et p. 172.*

Indos una cum Sinensibus ideis, numeris, lineis,  
imaginibus, figuris, & miræ, quam in singulis  
singunt, potestati multum tribuentes pythagorizant,  
tum supra ex parte tactum est, tum MORHOFIUS iterum  
demonstrat, qui plures veterum Indorum circa sci-  
entiam naturalem (ex cuius fontibus medicina orta  
est) sententias fuisse refert, sed de illis adeo confusa  
omnia, ut nihil quippiam distincti colligi inde pos-  
sit, nisi etiam, quæ e quorundam auctorum laciniis  
colliguntur. Id tamen constare ex hodiernis itine-  
rariis existimat, aliquid Pythagoricæ doctrinæ simi-  
le illas habere. μετεμψύχωσιν enim statuunt eamque  
sibi habent persuasissimam, adeo ut nulla ferme in-  
ter illos secta sit, sunt autem plurimæ, quæ non pro  
principio eam ponat. Indos certe in curatione mor-  
borum, inque primis epilepsiæ, quem HIPPOCRATES,  
vel quisquis illius libelli, inter scripta ejus superstitis,  
vir GALENI judicio memorabilis autor fuerit, Sa-  
crum appellat, quemque expiationibus & incanta-  
tionibus

*L. d. Morbo  
Sacro.*






tionibus curari affirmat, admodum esse superstitiosos, & amuletis non tantum, quibus verba minus nota inscripta sunt, collo primum apponendis, deinde in Gangem fluvium projiciendis, sed & verborum murmure pronunciatorum susurris multum tribuere, identidem deprehendi. Hanc autem medicinam amuletariam antiquissimam esse, & multis retro seculis à Sabæis Arabiæ incolis excultam, qui tilsemis & idolis magicis ad horoscopus fingendis maximam navabant operam, iisque ad sanandos morbos & consequenda alia bona magice utebantur ex Strabone, Agrippa, Gaffarello & Kirchero ADAMVS BRENDelius probatum ivit. Cujus quidem rei plura ne accumulem experimenta, virilis facit impotentia, non nisi fascino vel ligaturis, ut vocant debita, & non nisi ejusdem farinæ auxiliis auscultans. Vno certe plura mihi innotuere eorum exempla, qui virilitatis, quam in India amiserunt, repetendæ causa in eandem altera vice superatis itineris molestis profecti sunt, cujus quidem rei, omnem, qua patet historiam, sub ligaturæ Magicæ Macassarorum sive Insulæ celebæ incolarum elogio penes E. KÆMPFERVM non sine insigni animi voluptate legere licet. Huc vero an & ista sint referenda, quæ de Circassiis Medicis, ingentis libri ostentatione, & una cum cereæ accensione candelæ, ægrotantium pectori impositione morbos curantibus aut ægros fallentibus, & domestica animalia, capras, verveces, boves, vaccas ostri loco expectantibus, ut & de vetulis ructibus ori ægrorum immixtis morbis medentibus à

I. B.

*d. Curat.  
morb. per  
Carm. &  
Cant. mus.  
X,*

*h.c. Fasc. III  
Obs. XVI,*





*Itin. L. III.*  
*p. 147.*  
*1691. p. 145.*

I. B. TAVERNIERO satis luculenter sunt enarrata, & à  
 W. E. TENTZELIO dialogis menstruis inserta, in medio  
 relinquo, & ad ea, quæ dicenda supersunt, pergo.

## OBS. XV.



Chirurgiæ & Chirurgicis auxiliis magnum  
 statuere pretium Indi solent.

## SCHOLION.

Phlebotomiam ab Indis quondam & Sinensibus re-  
 pudiatam esse, supra vidimus; hodie vero tanta  
 frequentia & felicitate eandem illic administrari no-  
 vi, ut per lusum & jocum quasi fragmentis vitri acu-  
 tis in arterias venasq; mallei ope adactis sanguinem  
 notabili quantitate emissum viderim. Trepanatio-  
 nem vero absque terebræ adminiculo solius instru-  
 menti lati & acuti, cuneo quasi impulsu ministerio in  
 India exerceri, repetita edoctus sum autopsia. Præ-  
 ceteris tamen, cauteriis, igne actuali inurendis ma-  
 gnum statuunt pretium orientis populi. Præter-  
 quam enim, quod pertinacem quoque cephalalgiam  
 cauterio actuali sublatam noverim, lienis in primis,  
 hepatis, aliorumque viscerum obstructioni hoc præ-  
 fidii genus proprie dicatum volunt. ENGELBERTO  
 certe KÆMPFFERO, quo post WILHELMVM TEN RHYNE ne-  
 mo elegantius hoc exposuit argumentum, autore A-  
 rabes, Brahmenes, Sinenses, „dolores & affectus  
 „ quoscunque à flatibus, ut putant, ortos, asserunt  
 „ nunquam tolli posse facilius, quam cauteriis, igne  
 „ actuali inurendis. Igne vero an ferri cadentis?  
 „ Equi-



*d. Moxa.*  
*l. c. Fasc. III*  
*Obs. XII.*





„ Equidem junctam vulcani martisque vim experi-  
„ ri in humana machina sævitiam reputant, uti su-  
„ pervacaneam & inutilem, ita vero indignam ra-  
„ tionali medico, cui urendo non alia debeat esse in-  
„ tentio, quam ut impactam doloris materiam re-  
„ solvat, vel in flatus jam resolutam excludat & in-  
„ auras evocet. Malunt igitur tarde gliscentem, re-  
„ misse ustulantem, atque ut verbo dicam, ejus in-  
„ dolis ignem adhibere, qui inclusam morbi cau-  
„ sam mediante salis aperientis virtute lente tutoque  
„ evocet, quam qui stringente acrodente armatus  
„ vitriolo cutem carnemque crudeli impetu exedat.  
Et facta Arabum mentione, quæque ab iis adhibe-  
tur, urendi materia fusius explicata, „ Brahmenes, *l. c. p. 59L*  
„ pergit, quos Græcia Gymnosophistas vocat, In-  
„ dorum gentilium Sapientes, Theologi & Medici,  
„ tum qui ex eorum institutis sapiunt, gentiles cete-  
„ ri, non unius, sed varii generis cauteria pro mor-  
„ borum diversitate parant. Latitantes enim cau-  
„ sas, ajunt, & morbi cujusque indolem non unius  
„ esse generis; proinde unam eandemque ignis ma-  
„ teriam affectibus promiscue omnibus nequaquam  
„ congruere, eligendam esse, quam genio morbi cu-  
„ jusque aptam natam experientia docuerit. Va-  
„ rietatem vero illam explorasse, peregrino mihi  
„ datum non fuit. Clavum quis Herculi prius ex-  
„ cussit, quam à zelotypis istis doctoribus secre-  
„ ta artium exploraverit. Et paucis interjectis:  
„ Trans Gangem progrediens nobilissimum sane  
„ omnium & usitatissimum ignis fomitem invenio  
F apud







„ apud Sinenses & Japonios. Hoc fomite referunt  
 „ ante ipsius medicinæ inventionem, & omnem a-  
 „ liam Chirurgiæ notitiam temporibus admodum  
 „ priscis celebratam cauterisationem fuisse, atque  
 „ usum ejus per longam seculorum seriem ad se de-  
 „ mum dimanasse. Stupam hanc virtute ac vetu-  
 „ state præstantissimam sub communi appellatione  
 „ Moxæ non modo Sina domesticam habet, sed  
 „ omnes Sinensium literis & doctrina eruditæ nati-  
 „ ones, Japonii, Coræenses, Quinamenses, Luco-  
 „ nenses, Formosani, Coccincinenses, Tunkinen-  
 „ ses jam olim pro cauteriis sub eodem nomine ad-  
 „ optarunt. Cujus porro historiam ibidem magno  
 „ eruditionis apparatu, & luculentis experientiæ  
 „ testimoniis ibidem traditam legere licet, qua cum  
 „ WILHELMI TEN RHYNE, M. B. VALENTINI, I. N. PECHLINI,  
 „ aliorumque de moxa labores conferri merentur.  
 „ His si addas, quæ de Aegyptiorum Chirurgia  
 „ PROSPER ALPINVS commentatus est, hos quidem venæ  
 „ sectioni, quin & Arteriotomiæ & Scarificationi plus,  
 „ quam Indos indulgere, sed quoad inustiones, & cau-  
 „ teria, quæ vocant actualia eorumque multiplicem  
 „ variis in morbis, ut in epilepsia, paralyfi, apoplexia,  
 „ vertigine, inflammatione oculorum, aurium, den-  
 „ tium, defluxionibus catarrhalibus, pectus occupan-  
 „ tibus, hæmoptysi, phtisi, suppuratione & empyemate  
 „ pectoris, asthmate, flatulentia, induratione hepatis  
 „ atque lienis, in hydrope sub umbilico, & hypochon-  
 „ drio sinistro, in doloribus dorsi, lumborum, colli, ar-  
 „ ticularumque, utilitatem, ut & quoad inurendi mo-  
 „ dum

*d. moxa*  
*L. II. Obs.*  
*XXIV.*

*de Med.*  
*Aegypt.*





dum cum iisdem prorsus consentire, idem Cl. Autor,  
& ex eodem A. O. GOELIKE fidem faciunt.

*Hist. Chir.*  
*p. II. seq.*



## OBS. XVI.

Puerperæ & recens in India nati Chirurgiæ  
subsidiis impune carent.

### SCHOLION.

**H**æc tamen ut sint, fœminæ saltem puerperæ in  
India nulla indigent embryulcia aut alia ma-  
nuali operatione in partu difficili; uti plerisque  
cultioribus, sicut vocantur, gentibus persvasum est,  
alias necessaria. Licet enim obstetricibus non de-  
stituantur, pleræque tamen partum facilem cœli be-  
nignitate, & victus temperantia adjunctæ experiun-  
tur, infantes vero recens natos fasciis minime invol-  
vunt, sed sibi relictos brevi incedere, & quod maxime  
notatu dignum visum, recta artuum textura gaude-  
re, minimeque claudos & valgos deprehendi, cum  
in Hollandiam reversus paucarum intervallo hora-  
rum in loco non adeo hominibus referto quadragin-  
ta fere claudicantes numerare licuerit. Hujus rei  
ratio nemini amplius mira videbitur, qui victum  
simplicissimum & regimen simile esse optimum, &  
valetudini maxime conducere argumento non tam  
a brutis animantibus, quam vilioris conditionis ho-  
minibus, & rustica in primis gente desumpto, quorum  
vix centesimus quisque, imo ne millesimus quidem  
morbo quodam organico aut fontico, nisi ex causis  
plane fortuitis laborat, cum ditiorum, quin &  
F 2 magna-





*de diata  
puerp.  
d. vas. um-  
bil. deligat.*

magnatum liberi quo majori sollicitudine & cura educantur, eo pluribus & gravioribus vitiis expositi vivant; quam in rem egregiæ iterum Cl. Viri I. H. SCHVLZII meditationes de puerperarum, & recens natorum regimine commendari merentur. Fascias autem, quibus teneri infantes involvi solent, licet non omni careant utilitate, si tamen nimis fuerint arctæ, aut inæquales, artus ultra modum constringendo, meatus coarctando, & ligamentorum fibrarumque vim oscillatoriam refrænando noxias esse, indeque tenellorum distorsioni ossium occasionem dare, hæc vero omnia in sollicita nimis & curiosa fasciarum applicatione vix evitari posse, constat.

### OBS. XVII.


Medicamenta ex Indiis advecta uti variæ sunt indolis, ita & diversam merentur censuram.

### SCHOLION.

Quod si ea, quæ ex India saltem orientali ad nos transportantur medicamentorum genera enumerare singula, & dignum cuiusque pretium statuere animus esset, paucarum quod superest, plagularum spatium ea minime caperet. Omnia fere aromata, in officinis & culinis usitata, pleraque etiam aromatica ex Indiis originem agnoscunt. Vnde & potiorum eorum partem calida, quæ vocantur, constituunt medicamenta. Sunt tamen & cathartica non una

sen-






fenna, tamarindi, præter lignum, & succus aloë, mitio-  
 ris omnia indolis. Sic et opium anodyna, & nitrum re-  
 frigerante ac temperante virtute præditum cam-  
 phora, si quid aliud, calida & sexcenta alia ibi de-  
 prehendantur. Radices, cortices, gummata & re-  
 sinas, ut & alimenta & potulenta theam, coffee, sacha-  
 rum, oryzam magno cumulo ex Indiis allata sicco,  
 ut prætereamus pede. Hic vero ROSINI op-  
 portune recordor LENTILII, qui mercibus pharma-  
 ceuticis Amstelodamo Stutgardiam allatis lustrandis  
 occupatus, alia inter sequentem loquitur in modum:  
 „ oculos, nares, & linguam afficiebant ex Indiis al-  
 „ lata rarissima & curiosissima. Qualia sunt destil-  
 „ lata in Indiis olea cardamomi, cinamomi ex corti-  
 „ ce & foliis, cubebæ, caryophyllorum, galan-  
 „ gæ, piperis nigri, zingiberis, sassaparillæ, culilavan,  
 „ fantali citrini, terræ Indicæ. Hæc omnia olea  
 „ longe magis ætherea sunt & penetrantia, quam  
 „ quæ ex aromatis apud nos demum destillantur:  
 oleum vero cajeputi arthritidi & feberi dicatum viro  
 optimo non æque cognitum in A. N. C. à D. SCHENDO  
 ad L. SCHRÖCKIVM una cum aliis quibusdam Indiæ  
 rarioribus, ut & in ANNALIBVS VRATISLAVIENSIBVS  
 fusius descriptum occurrit. Inter rariora vero ex  
 Indiis allata spolia de Pedra Quadrata, aureis venis  
 prædito lapide quadrato, quem in calculo partuq;  
 difficili pulveris aut infusi forma, nec sine fructu ad-  
 hiberi novi, ego Respondens tanto majori gloriari  
 possum jure, quod à nemine ejus factam mentionem  
 noverim, nisi quod Cl. M. F. LOCHNERVS ad L. SCHRÖ-  
 CKIVM,

*Et. Med.*  
*Pr. p. 865.*

1727. *app.*

1723. *Nov.*  
*p. 568.*






*ep. de Parei-  
ra Brava,*

*Euph. Sa-  
tyr. P. II. p.  
3II.*

*Hort. Ma-  
labar. P. III  
Præf.*

CKIVM, sibi à D. D. VACKIO, Archiatro Cæsareo, vir-  
tutem ejus lithontripticam, quam in proprio corpo-  
re expertuserat, laudatam, ut & ex ephemeridibus  
venetis, Galleria di Minerva inscriptis To. V. p. X.  
p. 271. meminerit. Locum vero ejus natalem, nuspiam  
tactum novi esse napalam, tractum nempe monta-  
num inter Chinam & Tartariæ fines situm, ex quo  
mense cum primis Januario, quando locus iste fumis  
igneis, quibus alias abundat, est vacuus, eruitur. Ista  
vero, & si quæ sunt alia exoticorum genera medica-  
mentorum cum ab aliis nimis extollantur encomi-  
is, ab aliis alto contemnantur supercilio, nobis in-  
geniosa placet JO. BARCLAJI confessio, hisce concepta  
verbis: „ Per multa in solo nostro nata negligimus,  
„ quæ si portentosa servaret Aegyptus, aut Græcia  
„ miraculorum ferax, singula jam dudum lustrasse-  
„ mus, longinquorum nimis curiosi. De Malaba-  
ricæ regionis medicamentis HENRICVS VAN REEDE  
TOT DRAKENSTEIN ita exponit: „ Vivunt incolæ ad  
„ capularem fere senectutem, (vid. quæ supra de bre-  
vior earum vita sunt commemorata,) eorumque va-  
„ letudini prospiciunt. Indigenæ Medici, qui ex a-  
„ liis regionibus medicamenta non petunt, aut cer-  
„ te quam paucissima, illis solis, quæ ipsorum re-  
„ gio liberaliter suppeditat, contenti, quem morem  
„ Europæi libidem locorum felicissime imitantur:  
„ Belgæ vero, qui sub auspiciis Societatis orientalis  
„ Indiæ morantur, nescio qua oscitantia utuntur  
„ medicamentis, quæ primum ex illis locis petita  
„ per Persiam Arabiamque in Europam deferuntur,  
„ &





„ & hinc denuo mari in Indiam referuntur, fere ob-  
„ soleta & corrupta non sine summa sumtuum jactu-  
„ ra, qui huic rei sine ullo commodo impenduntur.  
Hæc vero postrema verba veritate non niti, toties ex-  
pertus, simulac in Indiam ventum est, remotis pristi-  
nis, obsoletis, nova comparari, præparari, ægrisque  
propinari, pace auctoris affirmare non dubito.

### OBS. XVIII.



Vt venena in India frequentia & valde dele-  
teria occurrunt, ita non defunt eximiæ  
virtutis antidota.

### SCHOLION.

**M**orsus animantium venenatos vix effugere in In-  
diis queunt peregrini & indigenæ, cum in viis  
publicis serpentes erecta cervice obvios quosque a-  
doriantur, sed & fugientes fugiant. Vegetabilia  
vero toxica hic valde esse deleteria, ENGELBERTVS  
iterum KÆMPFERVS notavit his, quæ sequuntur ver-  
bis: „ Aestuans inter tropicos solaris focus, ut salu-  
„ tares rerum naturalium virtutes, ita & deleteriam  
„ in venenis qualitatem magis intendit & acuit,  
„ quam sub zonis coeli magis algidi, “ idque viverræ  
mungo animantis, à quo usum radicis mungos edo-  
cti creduntur Javæ & Sumatræ incolæ, & veneni in-  
primis macassarïensis uberiori descriptione, quam  
non sine voluptate legas licet, sed & antidoti duplicis,  
radicis nempe Mungos & lap. viperini expositione il-  
lu-

*l.c. Fasc. III  
Obs. X.*







P. 534.

lustratum dedit. Huic vero M.F. LOCHNERI opera, qua Mungos, animalculum & radicem descriptam dedit, M.B. VALENTINI Indiæ litteratæ inserta jungenda erit. Ejus efficaciam antidoti æque ac lapidis viperini, expertus novi virtutes alexipharmacas. Is autem extrinsecus vulnusculis venenatis admotus tenacissime adhæret, donec veneno ex vulnere attracto saturatus sponte decidat, lacte nigricante hinc reddito, abluendo, ut ex indigenerarum ore locutus E. KÆMPFERVS fidem facit, qui exposito applicandi modo, Indis usitato ita pergit: „De efficacia hujus lapidis, & quæ  
„indies cum ipso instituuntur in India experimen-  
„tis multa dicenda inquirenda, dubitanda veni-  
„rent. Quicquid sit, spondent efficaciam veritatem  
„quotquot ex Hindostanis de lapide quæsi, & in-  
„numeros inveni, tum qui experimenta ipsos se fe-  
„cisse, tum qui facta suis oculis vidisse, mihi per  
„jovem lapidem jurarunt, adeo ut inter Indos de  
„viperini lapidis virtute contra serpentis Cabelo  
„morsum dubitare execrabilis incredulitatis cri-  
„men sit. Reliqua inter antidota Cocus di Maldiva, Nux medica Maldivensium dicta, in Insulis Maldiviensibus prope maris littora occurrens, & à Cocco vulgari cibo potuique Indorum dicato multum diversa virtute non tantum antepileptica, adque partum facilitandum, sed & alexipharmaca insignis commemoranda venit.

OBS.







## OBS. XIX.

Rei Indorum medicæ cum Sinica, Japonica,  
Persica, Aethiopica & Aegyptiaca pluri-  
mum analogiæ intercedit.

## SCHOLION.

Gentes versus orientem aut meridiem sitas simili-  
bus fere, quibus Indi, affligi morborum generi-  
bus, & simili fere medendi ratione curari, supra jam  
passim, occasione varia animadversum est. Non  
possum tamen quin de una Japonia, quæ reliquarum  
vicem supplebit, hæc quæ sequuntur Cl. KÆMPFERI  
verba hic iterum legenda proponam: „ Medicæ ar-  
„ tis quam (nostratis) Chirurgiæ gnariores sunt.  
„ Medicamentorum tamen farragine ægros non  
„ multum fatigant medici: qui morborum radicem,  
„ quam obstructionem vocant & doloris materiam  
„ (quam occlusos flatus ajunt) externa arte, puta  
„ acu, fumoque exterminant. Balneorum quoque  
„ usu domestico, quo indigenæ puritatem corpori  
„ quotidie conciliant, innumeros morbos vel citra  
„ intentionem profligant; contractos quoque con-  
„ tumaciores nostratium more ad thermas rele-  
„ gant, quibus sparsim regio scatet efficacissimis.  
Neque vero Indiam thermis plane destitui existi-  
mandum est, quorum decem ex ordine fontes vir-  
tute insigni præditas in regione, quæ zittecon patt-  
na appellatur, numerare licet. In universum solis  
G in





in regionibus orientalibus & meridionalibus majori fervori, & victui vitæque rationi, quæ plerisque istis in locis una est, dicta modo analogia accepta ferenda erit.

## OBS. XX.

Indiam inter utramque, orientalem & occidentalem seu Americam multa, si rem spectes naturalem & medicam, occurrunt, quæ sibi invicem respondent.

## SCHOLION.

**A**ëris hic eadem utrobique in locis æquatori subiectis aut certe non longe ab eodem remotis conditio, perpetuum utrobique ver, vel & perpetuus autumnus, æquinoctium fere perpetuum, summa locorum fertilitas, & reliqui effectus salutare & noxii in humanum quoque corpus redundantes observare licet.


Et si quod hic in locis præsertim magis ad orientem vel occidentem fitis deprehenditur discrimen, illud egregie doctissimus GVLIELMVS PISO, additis ubivis causis, notavit, verbis pone sequentibus:

*Hist. Nat.  
Brasil. p.4.*

„ Tempora anni non nisi duo sunt, calidum & siccum  
 „ æstas dicitur: alterum quod calidum & humidum  
 „ ac veri Europæo simile brumæ vicem supplet. Id-  
 „ que verissimum omnibus in Indiis intra utrum-  
 „ que tropicum deprehenditur. Hiemis enim &  
 „ æstatis initium atque finis licet ob particularia in-  
 „ cidentalocum, tum & æquatoris majorem vel mi-



no-





norem vicinitatem, non in idem tempus incidant: plerumque tamen annus sex fere mensibus ad humidum & totidem ad siccum vergentibus absolvitur. Adeo ut vel hinc etiam veritas Strabonis dicti confirmetur, nullum scilicet annum in Indiis inveniri utroque tempore sine pluviis. Et quidem ea ratione ut hic non, sicut in multis Africæ & Asiæ, ejusdem nobiscum latitudinis, oris, maxima exinde intensio & remissio æstus, sed nulla vel exigua saltem percipiatur, (sole licet Brasiliensium Zenith mense octobri & februario transeunte, radiosque secundum angulos acutissimos reflexis feriente terram.) Quæ diversitas istarum regionum incolis quod crebras malacias noxiosque tepores interitum: harum contra ob dominatricem auram salutem promittit perpetuam. Vnde facile est colligere, anni tempestates esse non tam immediate ex sole & astris eorumque motu æstimandas; quam ventorum specie & diversitate, regionisque qualitate ac situ peculiari. Eadem causa solennibus illis torridæ subsolanis vel favoniis reddi potest. Quin in locis istis mediterraneis paulo versus occidentem noctes non solum, sed & dies aliquando sunt frigidiores, quam in orientalibus littoralibus, usque adeo ut pruina aliquibus quandoque capillos riguisse constet. Etenim in Indiis cum multa sint admiranda, illud tamen vel in primis videtur omnium physicorum ingenia superare, quod in eadem cœli plaga, solis accessu & recessu pari, iisdemque anni mensibus ab orientali







*Schol. ad  
Obj. IV.*

*l. c. L. II.*

„ tali parte quidem circa oceanum æstas & siccitas  
 „ fit; ab occidentali vero transjuga montium & pa-  
 „ ludes Brasiliæ hiems, nebulæ & pluvia. Vt in  
 „ tanta locorum vicinitate, quod ad rationem tem-  
 „ pestatum attinet, iidem pene populi sibi mutuo  
 „ antipodes videantur esse. Parallelum fere exem-  
 „ plum supra de India orientali relatum occurrit.  
 „ Quam miram dissonamque naturæ varietatem at-  
 „ que alia ejuscemodi, si quis diligentius apud se re-  
 „ putet, profecto intelliget, antiquos multa de æqui-  
 „ noctiali circulo & torrida zona falso opinatos esse.  
 „ Cum contra quam Aristoteles & Plinius alique  
 „ sunt arbitrati, non solum habitabile hoc clima, sed  
 „ & temperatum ac fertile utique reddant, tum ro-  
 „ res perpetui, tum pluviae & jucundi à pelago fla-  
 „ tus, dum vapores mane surgentes, qui nebulas  
 „ tempestive discutiunt, æstumque meridionalem  
 „ temperant, ac soles purissimos & nitidissimos red-  
 „ dunt. Ac sicuti morbos Americæ endemios spa-  
 „ smos, catarrhos, hydropes, diarrhæas, dysenterias,  
 „ inque primis luem Indicam seu veneream, comme-  
 „ morante PISONE, eosdem fere esse deprehendimus,  
 „ quos in orientali India supra notavimus; ita & in me-  
 „ dicis & medicamentis Americanis magnam cum o-  
 „ rientalis auxiliis Indiæ deprehendimus convenienti-  
 „ am. Illa enim balsamis nativis, tolutano, peruvia-  
 „ no, oleis, mellibus non unius generis abundat, her-  
 „ barumque & radicum medicarum & ad tutandam  
 „ valetudinem potentium serpentariæ virginianæ,  
 „ contrayervæ, corticis chin. chinæ, Radicis chinæ, sar-  
 „ fa-






saparillæ, pareiræbravæ, ligni guajaci & sassafras,  
plurimumque aliorum ferax est. „ India autem ori-  
„ entalis atque occidentalis cum medicamentis o-  
„ mnium generum & ad omnem curandi necessita-  
„ tem instructior sit, quam Medicis Rationalibus,  
„ mirum esse nulli debet, quod hactenus tam multa  
„ insignium virtutum recondita in sinu gerat, quæ  
„ merito in lucem protrahantur, uti Piso iterum  
loquitur, cujus & hæc sunt verba: „ Experientia, au-  
„ torumque testimoniis constat, omnes passim In-  
„ diarum incolas medicinam facere, & morborum  
„ notitiam ex symptomatibus venari, ac causis ne-  
„ glectis communi quadam animi notione eruere  
„ indicationes ex morbis, iisque satisfacere contra-  
„ rium remedium opponendo. Et paucis interje-  
ctis: „ Quantum vero septentrionalium terrarum in-  
„ colæ Indiarum aromatibus aliisque medicamentis  
„ atque alimentis calefacientibus, ultra quam decet  
„ sunt dediti: tam e contrario Indi Aegyptiique ni-  
„ mis sunt proclives in vehementiora refrigeran-  
„ tia, immemores aut ignorantes, si par fuerit utro-  
„ bique error in excessu, hunc majorem vitæ no-  
„ xam minari. Nec dubium est, de Brasilia aliisque  
„ Indiarum locis recte dici, quod de Græcia olim  
„ Homerus: scilicet habere eam & suppeditare  
„ *Φάρμακα πολλά μὲν ἐσθλὰ μεμιγμένα, πολλὰ δὲ λυ-*  
„ *γρὰ.* Interim seniores & exercitatiores eximii  
„ sunt Botanici, facilique negotio omnis generis  
„ medicamina ex herbis undique in silvis conquisitis  
„ conficiunt, Idem vero doctissimus autor de vita  
Ame-

*l. c. p. 23.*





*l. c. p. 126*


Americanorum longæva sequentem loquitur in modum : „ Perquam mature pubescunt incolæ : senescunt tarde, idque sine canitie aut calvitio. Quo fit, „ quod longe ultra centesimum ætatis annum viridi senectâ, non Americani tantum, sed & ipsi Europæi fruantur totumque adeo territorium macrobium dici mereatur. Longe ab his diversa supra de Indiæ incolis orientalis propria autopsia edoctus commemoravi, cum quæ sequuntur illis per omnia congruant : „ Brasilianorum liberi vivacissimi cum ventre duro sint & prominulo, solidisque „ toris, quamvis subucula tantum leviori induantur, „ nihilominus injurias cœli secure contemnunt. Rident matres ineptam nostratium in vestiendis „ & educandis parvulis industriam, qua perspirationem impediri & catarrhos multos generari „ ajunt. Nulli inter illos strabones, lusciosi, claudigibbove deformati inveniuntur : cum tamen infantes nunquam aut linteis involvantur, aut involuti fasciis Europæorum more ligentur. Frigida „ frequenter lavantur. Idem provectioribus usitatissimum est : cum ob innatam genti munditiem, „ tum ob firmandam & tuendam corporis sanitatem.

## OBS. XXI.

In Nautica, seu Classianorum & Navigantium Medicina post spicilegium messis ampla relicta est.

SCHO-





## SCHOLION.



Indiam qui hodie utramque petunt, itinere maritimo eo plerumque tendunt & quidem satis diuturno & molesto, unde multi morbis correpti medicina indigent. Spicilegium hac in re fecerunt I. R. GLAVBERVS & W. COCKBVRN, sed spicilegium tantum. GLAVBERVS enim famem & sitim, ceu præcipuas navigantium molestias respiciens, utriq; medelam, fami ex frumento concentrato & in mellis formam redacto, siti vero ex salis spiritu singulari arte confecto parare contendit. COCKBVRNI vero libellum futuri tantum operis particulam esse, & nonnullas tantum de navigantium morbis observationes tradere, ex ERVDITORVM ACTIS discimus. In ea vero, quæ Cl. CHRISTIANI VATERI præsidio à M. P. ab ASPEREN Hafniensi ventilata prostat de Morbis Classiariorum & Navigantium, eorumque remediis dissertatione, tum horum causæ morborum ad liquidum perductæ, tum singulorum remedia indigitata sunt. Sunt autem ex tot causarum numero, in mortalium perniciem quasi conspirantium oriundi morbi, nausea in primis, vomitus, omnis generis febres, scorbutus, variis stipatus symptomatibus, arthritis, oculorum vitia non una, contusiones, luxationes, fracturæ & sexcenta alia mala, aëris vel frigidioris, vel calidioris, aut impurioris & infectis scatentis, vel & victus culpa, & aquæ in-

*d. Consol.  
Navig.  
d. morb.  
Navig.*

1697. p. 549  
1698. p. 523.  
*Vicemb.*  
1715.

pri-







*t. c. L. l. p. 2.*

*Locul. XLI  
p. 439.*

*Phys. Sub-  
terr. p. 368.*

primis puræ dulcis & recentis defectu miseris navi-  
gantibus infesta, multis etiam funesta, adeo ut ex cen-  
tenis navem in Hollandia ingressis vix unum atque  
alterum, ad caput usq; bonæ spei, famosum illud Afri-  
cæ promontorium, nedum in Indiam salvum atque  
incolumem pervenisse, verissimaq; esse deprehende-  
rim, quæ à nemine forsan sine horrore, ita ut a I. A. de  
MANDELSLO relata sunt, leguntur: sub linea nempe  
æquinoctiali degentes, & solis ardore quasi exuïtos,  
aqua pura sufficienti destitutos, marina falsa, & ut ple-  
risque cum PISONE videtur, insectis repleta utentes,  
non scorbutum tantum, dysenteria, & febribus mali-  
gnis corripì, iisdemque confectos fatis cedere, sed &  
non paucos furore abreptos, & per læsam imaginati-  
onem se Reges, Principes Dæmones existimantes,  
quin & anabaptistas & desperabundos se in mare  
præcipites dare. Hisce tot actantis malis medelam  
parare & undiquaq; conquirere operæ erit pretium.  
Hinc CHRISTIANVS Daniæ Rex sæculi prioris anno  
quadragesimo commotus universo collegio Medico  
Hafniensi clementissime injunxit, ut in commune  
omnes cito & studiose deliberarent, quomodo tot  
morbi & inprimis febres periculosæ & contagiosæ,  
quæ in Holmia inter nauclos regios tum tempo-  
ris maxime grassabantur, curari & præcaveri pos-  
sint, ut T. BARTHOLINVS in Cista Medica fidem facit.  
Spiritu vini in regionibus putridis & in scorbutum,  
ubi sanguis ex nimis falso aëre & cibo acefcit, ceu  
præstantissimum cum I. I. BECHERO commendant  
plerique auxilium, illum vero noxium atque ex illius  
usu





usu vel potius abusu scorbutum ferinum, icterum hydroprem aliaque mala contraxisse nautas, Medici observarunt Dani, ut est in ACTIS HAFNIENSIBVS fufius relatum. Quin & in frigidis regionibus nautas, quibus plenus victus & abundantia spiritus vini data fuere, omnes ad unum subitanea & præmatura morte sæpe extinctos esse, e contrario vero Anglos aliosque casu ibidem relictos, & sola aqua miserrimisque offulis è balenarum reliquiis situ & marco corruptis paratis per novem menses & amplius vitam servasse, & integra sanitate ad suos rediisse, ex M. LISTERO C. VATERVS observat. Quare FRIDERICI DEKKERI consilium classiariis & navigantibus salutare & dignum visum est, quod labori præsentì colophonem imponat. Is enim vero artis usu præstantissimus quondam in Belgio Medicus præterquam quod theriacam sacram navigantium anchoram passim appellat, in primis notandum judicat, nautis & qui per mare diu navigant, non tam spirituosam, volatilia, quam acida vel subacida convenire, imo inter medicamenta illis proficua oleum vitrioli omnibus palmam præripere, item poma citria, limona & similia. Hæc vero omnia navigantium ærumnis mitigandis neutiquam sufficere, sed sufficientem aquæ dulcis copiam una cum carnibus recentibus & similis farinæ leguminibus omnibus reliquis præsidis longe anteferendam, horum vero omnium aservationem in navibus diuturno itinere vectis, possibilem esse, classes ex India reduces, & omni rerum ad vitam necessariarum apparatu sufficienti instru-

H


Etæ,

*Vol. V. Obs.  
CXVIII.*

*l. c. p. 26.*


*Exerc. Pr.  
p. 579.*







etæ, neque adeo morbis expolitæ satis, opinor, evin-  
cunt. Hanc vero messem ulterius ingredi merito  
veremur, qui spicilegium non messem facere con-  
stituimus. Quare & spicas colligimus, & hoc quic-  
quid est operis aliis majori ingenii felicitate  
judicii que acumine gaudentibus lu-  
bentes relinquimus.

S. D. G.



Co-





## COROLLARIA.

I.

**D**iluvii universalis argumentum non postremum Historia suggerit Naturalis.

II. Notatu dignum est, herbas & vegetabilia quasi positive a D. O. M. ut comedantur, juberi, carnes autem aut prohiberi, aut quasi connivendo tantum concedi, vid. Gen. IX. 3. I. 29. 30.

III. Ex Ps. CIV. 15. frustra patrocinium suæ quærunt sententiæ Medici & Philosophi Pneumatici.

IV. Dari purgatorium, Theologi quoque orthodoxi adserere non dubitant.

V. Ex eo, quod numero idem non est hominis provectioris corpus ætatis, quod in juventute aut prima fuit infantia, frustra HENR. MORVS juxta Jobi XIX. 25. sq. adserere dubitat, idem numero corpus ex mortuis aliquando resurrecturum esse.


VI. Umbilicalium ligatura vasorum non adeo necessaria, hæmorrhagiæ saltem ex eadem intermissa metus frustraneus esse videtur.



- VII. Vulnerum lethali-  
tatem quando arctis  
adeo limitibus circumscribunt Medici,  
non ideo de poenis vel mitigandis vel au-  
gendis, quod Ictorum est, sunt solliciti.
- VIII. De partus semestris, septimestris, octi-  
mestris, vel decimestris, & ultra vitali-  
tate, vel idcirco iudicium ferre accuratum  
& numeris omnibus absolutum difficile  
est, quod conceptionis momentum &  
graviditatis initium plerumque lateat aut  
dubium sit.
- IX. Chin-chinæ usus in febribus intermit-  
tentibus sæpe noxius, interdum infons &  
securus, raro admodum necessarius est.
- X. Rerum non naturalium appellatio apud  
Hippocratem & Galenum non occurrit,  
sed sequioris ævi partus est.







\* \* \* \* \*

**M**ehrter Parmann / Deine Reisen  
 Sind zwar billig hoch zu preisen,  
 Doch sie sind es nicht allein.  
 Was du bey so viel Gefahren  
 In der Arzneyen erfahren  
 Muß Dir rühm- und nützlich seyn.

\* \* \* \* \*

**S**war die Kunst steht alle Stunden,  
 Nicht an Zeit und Ort gebunden  
 Jedem offen und bereit.  
 Doch wer emsig sich bemühet,  
 Und in ferne Lande ziehet,  
 Der wird destomehr erfreut.

\* \* \* \* \*

**W**er das güldne Blies erlangen  
 Wer mit Lorbeer-Kränzen prangen,  
 Wer mit Ernst ersteigen will  
 Helicons erhabne Spitzen,  
 Der muß öftters zittern, schwitzen,  
 Lauffen, ringen, halten still.

\* \* \* \* \*

**D**rum so folgt auf Dein Bemühen,  
 Auf Dein hin und wieder Ziehen  
 Nun auch der erwünschte Lohn.  
 Gebe GOTT, der Gaben Quelle,  
 Daß ohn alle Unglücks-Fälle,  
 Seine Gnade bey Dir wohn.

Also wünschet

Der PRAESES.

Der



\*

Der strenge Cato ließ die Medicos vertreiben, a)  
 In dem berühmten Rom behielt keiner Sitz.  
 In ganz Italien ließ er nicht einen bleiben,  
 Der hoch-erfahren war, nach weiser Griechen  
 Wiß.

Dallzu strenger Schluß! weit klüger ist geschrieben  
 Von dem, der weiser ist, als jener Römer war,  
 Des Syrach's weiser Mund, der lehret, daß zu lie-  
 ben, b)

Und hoch zu ehren sey ein Arzt, der in der Schaar  
 Der wahren Kenner steht, die Gott von Herzen ehren,  
 Die bey der Arzneyen erkennen Gottes Krafft,  
 Die lernen emsiglich, wie sie nur mögen lehren  
 Des Höchsten Wunderwerck, und was die All-  
 macht schafft.



Er kan, mein werther Freund / von vielen Wun-  
 dern sagen,

Die auf dem weiten Meer gar wunderbarlich sind,  
 Die uns an diesem Ort unmöglich zu erfragen,  
 Woben der Klügeste doch immerdar ein Kind.  
 Er will hinführo auch aus den Geschöpfen lesen,  
 Ja wie die Erde voll der Güte Gottes sey,  
 Das kleinste Geschöpf beweiset Gottes Wesen,  
 Des Höchsten Wunderwerck ist selbst die Arzney.  
 Was kan demnach sein Fleiß begieriger erwehlen,  
 Als, daß Er ferner hin nach solcher Weisheit steht,  
 Die

a) Polydorus Vergilius de rerum inventoribus lib. I.  
 cap. XX.

b) Syrach XXXVIII. v. I. & seqq.





Die ihren Freunden nie die Ehre läßt fehlen,  
Womit Er hoch berühmt nun ausgeschmückt  
geht.

Gott segne Seinen Fleiß! Er segne Sein Curiren!  
Es steh der beste Arzt Ihm ferner kräftig bey!  
Gott wolle Gnaden-reich Ihn treulich also führen,  
Daß Er in dieser Welt, und dort gesegnet sey!

Hiermit hat dem HochEdlen und HochErfahr-  
nen Herrn Parmann, als Seinem lieb-  
wehrttem Beicht-Sohn zu der Doctor-  
Würde so willig, als schuldig gratuliren  
wollen,

Ludwig Schumacher/

Minist. Hamel. Senior.

Erlaube wehrter Freund / daß ich nach meiner  
Pflicht,

Da du heut Doctor wirst, Dir schlechte Wünsche  
bringe,

Und Deinen Ehren-Tag aus Herzens-Grund besinge;

Verschmähe dieses Blat von Deinem Diener nicht.

Es schenkt Apollo Dir den längst verdienten Lohn,

Weil Du von Jugend auf der Tugend echtes Wesen

Und edle Wissenschaft zu lieben auserlesen;

Gebührt die Ehre Dir gleich einem Musen Sohn:

Du hast die Medicin mit sonderbahrem Fleiß

Gelernet und geübt in mehr als funfzehn Jahren,

Was Krancken heilsahm ist geprüft und erfahren,

Wie diß Ost-Indien annoch zu rühmen weiß.

Nun



Nun soll Europa auch von der Geschicklichkeit,  
 Die Gott Dir beygelegt nach Wunsche profitiren;  
 Du wilt in selbigem was krank und schwach curiren:  
 Obs gleich zu wieder ist dem höchst-erbosten Reid.  
 Der Höchste stehe Dir in Deinem Vorsatz bey,  
 Er lasse Freuden-Del auf Deine Scheitel rinnen,  
 Er cröne Deine Cur, Dein Lassen und Beginnen,  
 Damit was kräncklich ist von Schwachheit künfftig  
 frey.

So manniges Recept von Dir geschrieben ist;  
 So manger Raht annoch Gebrechliche erquicket:  
 So manger Seegen sey von Gott Dir zugeschicket,  
 Da Du, mein wehrter Freund! nunmehr Doctor  
 bist.

Wird dann was elend ist nächst Gott durch Dich ge-  
 fund,  
 Und darff für grosser Pein hinkünfftig nicht mehr kla-  
 gen,

So wird die ganze Welt von deinen Curen sagen:  
 Der Himmel gebe es! Dis wünschet Herz und Mund

Ihro HochEdl. des Herrn Doctoris Paxmanns  
 ergebensten Dieners und Bettern,

**Iust Heinrich Leo**

Der Hämelschen Schulen p. t. Conrectoris.

